

華


陽

集

三



華陽集



華陽集卷十八

內制

戒諭夏國主詔

維乃祖考克有西土。世爲漢藩輔。今爾弗蹈于前烈。迺竊署重爵。以奉幣于朝方。邊吏拒還。乃復稽留境上。不及廷見之期。泊朕親覽貢函。而僭我王命。實如所聞。朕疑風俗荒遠。未達朝廷之儀。雖然。棄信慢常。義不可長。其務思先世之約。以保綏于斯民。毋忽是圖。以奸我有邦之罰。

賜夏國主令遵守藩儀詔

朝廷戢兵。所以息民。施德所以懷遠。顧西夏之封守。奉累朝之詔書。不意近歲以來。繼有無名之舉。邊隅多擾。生聚靡寧。乃至去秋。忽迫大順。雖云報仇于熟戶。實亦拒戰于官軍。皆謂已萌之情。可見不順之迹。先皇帝終務全于國體。且往詰其事端。泊朕纂承之初。尤思撫御之略。載覽來章之述。有嘉大義之存。矧舊載于宗盟。當復躬于忠訓。宜念祖先之服。益遵藩翰之儀。使永無兵革之虞。衆遂耕耘之樂。自享多福。以傳無窮。

賜夏國主今後表章如舊制稱賜姓詔

上旻降禍。萬國纏哀。恭馳遣使。肅申慰禮。情雖深于永慕。事或易于舊聞。維乃祖之稱藩。有先朝之賜姓。撫綏隆于君義。親愛篤于人倫。自再納于誓言。亦具循于軌式。忽形需奏。靡固宗盟。言念舉錯之違。得非左右之惑。宜存遠慮。用迪前猷。

賜夏國主令發遣熟戶仍不得侵踐地界詔

朕修文德。所以懷遠人之安。戢威武。所以廣諸夏之福。豈欲爲邊生患。與衆興勞。今據逐路經略司奏。自嘉祐七年春。至今秋以來。夏國人騎。或脅略近邊熟戶。或侵踐當界民疇。或假以金錢。購亡命之卒。或誑以官爵。誘無圖之夫。爲日滋深。爲害未已。朕新膺大統。奄宅中區。旣思輯藩臣之和。又將杜邊事之漸。按西平之舊則。參慶歷之再盟。未肩祖父之忠。頗忽朝廷之制。緬懷裔土。久慕化風。豈委任之失人。致講陳之非計。夫享盛福者。莫如躬德義。蹈後艱者。靡不繇僭狂。勉循至言。庶保先約。

賜夏國主給還綏州誓詔

朕紹承天命。盡四海而撫懷之。況爾世守西土。爲國藩輔者乎。今復懲既往之非。篤自新之志。質于天地。要之鬼神。載貢誓文。納忠王室。朕方推大信。以示萬邦。俯同茲言。永無有易。

賜夏國主不還綏州詔

朕嗣膺丕歷。勤撫庶邦。凡德澤之所加。固邇遐之無間。矧惟西夏。屏于一方。比載覽于誓文。尋俯同于誠。

請逮按還于舊境。忽并述于異端。因念二寨之民。豈無故俗之戀。使各安其生聚。且曲示于仁恩。蓋徇彼情。匪樂生事。重披來奏。尙有所陳。宜自斥于末圖。庶共恢于遠略。

賜夏國主乞用漢儀詔

使傳之馳。爲規固久。候亭之陋。能飾而新。旣肩世服之忠。又樂邦儀之慕。忽披來牘。具體迺誠。如用漢儀。只依昨來張宗義所行儀式次第。餘並依舊詔。

賜夏國主乞早頒封冊允詔

比輸忠款。願襲世榮。已飭牧司。式備封冊。屬使人之勤請。欲誓詔之早頒。庶彼邊民。聞我朝命。得遂耕耘之便。更無兵革之虞。所宜允從。當體睦遇。

賜夏國主爲行冊禮詔

茲閱函封。重申誓約。本誠心之自篤。爲封守之遠圖。朕已飭使人。將馳冊禮。旣游綏于世土。宜先諭于邊氓。庶遂耕耘之私。永無兵革之患。緬惟忠順。當體眷勤。

詔夏國主乞贖大藏經詔

大雄流教。善利無方。信士篤緣。羣迷釋趣。喜觀心于法境。願釋理于祕文。載省控陳。所宜開允。其請贖經文。已指揮印經院印造。候嘉祐十一年正旦。人到關給付。

賜夏國主乞工匠詔

紹固世封。述修邦貢。率我朝廷之化。時迺祖父之規。遽閱來章。蓋無前比。宜敦爾守。難徇所陳。自西平王以來。無此陳請。且宜循守舊規。

賜夏國主乞買物詔

善纂前修。遯守西土。通奏函于信介。易服用于上都。體乃馳誠。勤于嚮化。特從俞允。用洽睦私。

賜夏國主麻日詔

王者握樞凝命。推麻授時。以攷陰陽之端。以明政教之始。睦遐綏于藩土。嘉夙奉于王正。適履上辰。更頒密度。今賜治平二年麻日一卷。至可領也。

賜夏國主賀正旦進馬駝詔

淑律開年。芳風被物。世善守封之固。歲膺頒朔之祥。修時貢之是歸。嚮邦風之有益。載惟勤節。良起嘆懷。

賜夏國主賀大行皇帝乾元節進馬詔

邦禍上延。宸遊永隔。遯念世封之守。夙持歲貢之來。寵有常規。勵于素節。

賜夏國主賀壽聖節進馬詔

方春首祚。維月生明。適臨載誕之辰。申祝無疆之歷。慶函爰上。方貢是陳。緬念忠勤。舉深嘉獎。

賜夏國主賀登寶位進方物詔

朕惕奉靈謀。丕膺皇統。眷守封于西土。勤述職于中邦。宜有匪頒。式將倚遇。

賜夏國主仲冬時服詔

愛景流空。寒威厲物。緬念西陲之守。嗣推累世之忠。飭使驛之于行。頒冬裘之載煖。益肩順節。永報恩華。今差某官賜仲冬時服具如別錄。至可領也。

又

農入場功。虞歸澤賦。湊念西陲之守。肇迎北陸之寒。馳遣使輶。往頒恩篚。旣安且吉。宜厲而忠。

又

紹封西土。述貢中邦。眷塞路之阻遐。方寒威之率厲。爰命乘輶之使。特頒在笥之衣。茲示寵私。以褒忠勣。

又

趨遵朝矩。慎守世封。顧迅暑之易遷。屬寒風之又至。特命乘輶之使。往頒在笥之衣。尙體眷勤。益昭忠瘁。

賜夏國主生日禮物詔

保有世封。善歸時貢。西郊展輅。迎氣始清。左戶垂弧。紀祥初誕。爰頒寵幣。往續茂齡。今差某官賜生日禮物具如別錄。至可領也。

又

素律凝商。涼颺應物。載紀左弧之慶。善承西土之封。使得先期。朝頒有匪。式將恩禮。以續壽祺。

又

善述世忠。懋修邦貢。素商始序。嘉誕協辰。爰飭使輅。往頒朝幣。續爾壽祉。體予睦懷。

又

嗣守世封。善歸時貢。屬祁寒之薦候。嘉誕日之開祥。俾夙致于寵頒。庶務迎于嘉祉。宜欽禮遇。益紹忠勤。

賜契丹皇帝賀正旦大使茶藥詔

卿龍銜君命。歡固邦情。展歲慶于端辰。勤使華于修睦。式頒良劑。以輔至和。

又

窮陰適謝。寶厯更新。念使馭之夙征。申鄰國之永睦。風霜偃薄。原隰馳驅。宜將靈劑之頒。庶適沖襟之輔。

又

卿舉循使範。來締鄰歡。載馳川陸之遙。適冒風霜之勁。上奩均錫。征取紆勞。

賜契丹皇帝賀正旦副使茶藥詔

卿奉持鄰好。來會歲儀。屬寒籥之氣嚴。涉塞亭之道遠。特持嘉錫。用示至懷。

又

卿夙貳使車。甫臨中道。正涉風霜之厲。靡勝原隰之勞。特示匪頒。用將瞻遇。

又

卿夙戒使輶。遠將鄰幣。適冒霜威之厲。載馳川路之長。申念多瀟。特蕃嘉錫。

賜契丹皇帝賀乾元節大使茶藥詔

卿隰轡馳華。國函通睦。言慶誕辰之會。初離炎律之煩。往致匪頒。就申瞻勞。

賜賀乾元節副使茶藥詔

卿榮貳使輶。肅持邦幣。祥紀乘離之旦。聘來于隰之華。推錫上臺。慰勸中道。

賜契丹皇帝賀壽聖節大使茶藥詔

誕節紀春。使華乘隰。通鄰函之永好。勤塞路之遐征。申念夙勞。宜膺寵賚。

賜賀壽聖節副使茶藥詔

卿榮貳使華。協通鄰睦。屬祁寒之晚候。冒脩陸以遄征。宜服寵頒。用資和裔。

賜契丹皇帝弔慰大使茶藥詔

遼國鉅哀。方遵喪節。承邦永好。遽置慰函。溽暑御辰。脩塗勞轡。宜蕃珍錫。以輔至和。

賜弔慰副使茶藥詔

卿預介使儀。初聞鄰恤。受君言而夙駕。修邦慰以如期。炎歊正煩。行邁靡止。宜推賜式。往輔時休。

賜契丹皇帝祭奠大行皇帝大使茶藥詔

禍延國變。契重邦情。有嚴使牡之馳。來致奠觴之祭。道離煩暑。心往神幾。宜被殊頒。用扶沖齋。

賜祭奠大行皇帝副使茶藥詔

卿參馳使傳。祇會鄰凶。將陳歸賻之儀。益起賓空之慕。夙登長陸。寢歷近郵。宜均邦錫之良。以助道腴之味。

賜契丹皇帝賀登寶位大使茶藥詔

卿選馳使節。慶續休期。載勤夙駕之征。言涉半途之候。桐錄之種。建谿之英。並助遵調。且紓行邁。

賜賀登寶位副使茶藥詔

卿夙將信幣。參駕封車。屬膺皇歷之新。來致寶鄰之問。金甌振響。鱗隰飛華。宜有寵頒。用扶沖履。

賜契丹皇太后賀正旦大使茶藥詔

卿議穆賓華。聘交鄰好。念馳勞于寒日。特齎賚于中途。俾助遵調。益申睦摯。

賜賀正旦大使茶藥詔

卿講二國之歡。會三朝之慶。適冒風霜之勁。載馳原隰之長。宜命匪頒。庶資保輔。

賜賀正旦大使茶藥詔

卿講和鄰契。奉慶春元。飭華御之遵途。屬窮陰之凋歲。匪將賜式。曷示寵懷。

賜賀正旦副使茶藥詔

卿選貳使材。好通鄰睦。洊經途于郡堞。將會慶于歲儀。匪出恩頒。曷優禮遇。

賜賀正旦副使茶藥詔

卿榮介使華。肅持聘禮。冒寒威之率厲。馳塞路之逶迤。俾輔至和。用將珍錫。

賜賀正旦副使茶藥詔

卿敦講鄰和。輔承使指。方寒威之正厲。念長路之多勤。宜有寵頒。用資沖嗇。

賜契丹皇太后賀乾元節大使茶藥詔

卿通歡鄰契。修慶誕期。俯夏篇之御辰。嘉使旃之勤命。用持邦錫。以輔時休。

賜賀乾元節副使茶藥詔

卿參膺邦選。紹睦鄰音。紀電照之初期。念星馳之夙駕。俾爰嘉賓。庸導撫懷。

賜契丹皇太后賀壽聖節大使茶藥詔

誕祥紀節。鄰聘將儀。遵使驛于長途。弭征驂于近堞。芳菲靈劑。式厚于頒。

賜賀壽聖節副使茶藥詔

卿將鄰寶之和。趨誕祥之會。歷塞亭之長道。驚歲筦之殘陰。禮有常頒。念申永好。

賜契丹皇太后弔慰大使茶藥詔

比遼國凶。旋馳鄰告。申有經之弔禮。及在疚之哀懷。炎御流空。飛旂在道。宜資調適。且厚瞻存。

賜弔慰副使茶藥詔

卿肅參使選。遐致鄰音。介信傳之遄征。及橫宮之永慕。暑威煩溽。塞路阻長。載惟衝冒之勤。宜有綏調之助。

賜契丹皇太后祭奠大行皇帝大使茶藥詔

鍾聲上旻。遏音四海。夙講鄰疆之契。遽將禮贈之歸。暑氣鬱興。征途長驚。獨煩輔疾。宜有寵頒。

賜祭奠大行皇帝副使茶藥詔

卿介聯賓範。嗣講鄰和。馳信節于星驂。來奠樽于玉几。炎威勃濶。行道逶迤。均賜上奩。紆勞近驛。

賜賀登寶位大使茶藥詔

嗣邦之統。早達信函。繼世之歡。復來聘節。驅馳原隔。蒙犯風霜。將賜之蕃。奮神以裕。

賜賀登寶位副使茶藥詔

天垂丕命。甫嗣皇圖。國有善鄰。具將永好。參服使駢之寵。遠馳征陸之勤。賜出上郡。和生爽侯。

賜大遼皇帝賀正旦大使茶藥詔

卿修和鄰契。會慶春元。願偃薄于寒威。宜輔綏于靈氣。爰將嘉錫。庸獎至釐。

又

嗣更歲祚。祇達朝言。將拭玉以展儀。正蒙霜而在道。願馳驅之靡止。諒調適之難中。有臆于頒。惟和是寄。

賜大遼皇帝賀正旦副使茶藥詔

卿參馳使傳。游講鄰歡。屬冬霭之正嚴。願征途之多勤。宜申嘉惠。用輔至和。

又

卿肅陪使指。參講鄰歡。驅馳原隰之長。偃薄風霜之厲。宜申邦賚。以厚賓儀。

賜大遼皇帝弔慰大使茶藥詔

使傳兼途。適寧郡舍。慰函敦好。靡後鄰哀。願馳邊驛之長。言涉暑威之熾。特頒靈劑。用輔沖襟。

賜西蕃邈川首領保順軍節度洮州管內觀察處置押蕃落等使董戡支俸詔

卿時推僞略。世濟茂勳。方崇建于高牙。且紹綏于舊土。宜優廩祿之給。以寵封疆之勞。其體注懷。毋忘欽

荷。

賜董戢加食邑實封誥敕示諭詔

卿材推種豪代襲邦爵乃眷守方之勤特頒進律之恩往奉徽章永綏外圉今賜卿加恩官誥敕牒到可祇受。

賜起復董戢官告敕牒對衣等示諭詔

卿材雄種落世守方隅眷恪奉于王輸宜嗣膺于孝服特起苴麻之制更專鈇鉞之征往厲忠圖永綏休命。

華陽集卷十九

內制

皇帝賀契丹皇帝正旦書

伯、大宋皇帝致書于姪、大契丹聖文神武睿孝皇帝闕下。寒威收節，淑氣闡辰。想履德之多勤，宜薦祥之有裕。爰馳使傳，聿致邦儀。肇慶春元，永孚鄰好。今差某官充正旦國信使，副有少禮物，具諸別幅。專奉書陳賀，不宣。白。

皇帝請契丹皇帝達皇太后正旦禮物書

伯、大宋皇帝致書于姪、大契丹聖文神武睿孝皇帝闕下。歲籥更端，物華蕃始。想極親闈之奉，舉迎邦社之休。歡薦善鄰，禮申常聘。庶因晨夕，爲道誠悰。今差某官充皇太后正旦國信使，副有少禮物，具諸別幅。專奉書披述，不宣。謹白。

回契丹賀乾元節書

伯、大宋皇帝致書于姪、大契丹聖文神武睿孝皇帝闕下。誕符表慶，環臨夏籥之初。聘節修歡，垂祝邦圖之懋。味書詞之載緝，閱禮幣之維豐。感鏤所深，諭言非盡。今某官等，迴專奉書陳謝，不宣。白。

回契丹達皇太后賀乾元節謝書

伯、大宋皇帝致書于姪、大契丹聖文神武睿孝皇帝闕下。初炎履候、載誕膺期、嗣修鄰好之勤、曲導慈音之貺、祥延邦歷、聘厚物儀、滋用感藏、具因敷達。此下同前篇。○〔案〕以上四篇在仁宗時。

皇帝賀契丹皇帝正旦書

兄、大宋皇帝致書于弟、大契丹聖文神武睿孝皇帝闕下。天令發春、年芳動陸、息民之好、方交篤于鄰情、履日之元、諒蕃應于時祉、爰馳使傳、遙達慶函。此下同前篇。

皇帝賀契丹皇太后正旦書

姪、大宋皇帝謹致書于嬪、大契丹慈懿仁和文惠純孝廣愛宗天皇太后闕下。氣更年筦、物動春華、使駟于行、具將鄰好、壽觴之薦、益介時休、祝想所深、諭旨曷旣、今差某官充正旦國信使、副有少禮物、具諸別幅、專奉陳賀、不宜、謹白。

皇帝回契丹皇帝賀壽聖節書

兄、大宋皇帝致書于弟、大契丹聖文神武睿孝皇帝闕下。春陽始布、月朏初華、紀誕節之嘉祥、申寶鄰之永好、特紆使傳、爰致慶儀、載味勳辭、具深感素、今某官等迴專奉書陳謝、不宜、白。

皇帝回契丹皇太后賀壽聖節書

姪、大宋皇帝、謹致書于嬪、大契丹慈懿仁 and 文惠純孝廣愛宗天皇太后闕下、春和布律、爰紀于誕期、鄰聘飛輶、荐申于慶祝、既玩書辭之緝、兼承信幣之豐、欣感所深、諭言非既、今某官等迴專奉書陳謝、不宜謹白、（案）以上四篇在英宗時。

皇帝賀大遼皇帝正旦書

姪、大宋皇帝謹致書於叔、大遼聖文神武全功大略總仁睿孝天祐皇帝闕下、物華資始、天令更端、緬維順履之修、益修純休之受、載馳使傳、交釋鄰歡、詠祝之深、諭言曷究、此下同首篇。

皇帝謹賀大遼皇太后正旦書

姪孫、大宋皇帝致書于叔祖母、大遼慈懿仁 and 文惠純孝顯聖昭德廣愛宗天皇太后闕下、天令更端、物心華始、惟茂敦于柔度、固丕介于純釐、矧修鄰好之長、用致歲儀之慶、茲爲遙頌、未易勝陳、此下同第

回大遼賀同天節書

姪、大宋皇帝謹致書于叔、大遼聖文神武全功大略聰仁睿孝天祐皇帝闕下、執衡施令、載紀于誕祥、奕世修歡、具敦于鄰契、遐馳使傳、曲遺慶儀、載味勤辭、徒深感素、今某官等迴專奉書陳謝、不宜謹白、

回大遼皇太后賀同天節書

姪孫、大宋皇帝謹致書于叔祖母、大遼慈懿仁 and 文惠純孝顯聖昭德廣愛宗天皇太后闕下、候屬初夏、

時宜盛陽。特紆使傳之華。夙致誕辰之慶。情敦永睦。物過常豐。其在榮藏。曷殫敷喻。〔此下與前篇同。〕○
宗時〔案〕以上四篇在神

賜大理寺審刑院官吏等斷絕獎諭敕書

昔天下之網嘗密矣。然姦軌之不勝。豈法令者非致治之具耶。朕德惠未孚。致民多辟。敢不惟刑之憂。汝等識法詳平。決無留獄。與冒嘉嘆。靡忘于中。

又

在昔至治之世。法施而民不犯。今天下具獄之上。歲不可勝計。何其化薄而罹罪者蕃。爾等蔽斷詳明。罔不適刑之中。朕方哀念繫繫之人。乃克無重輕隨決。章達予聽。嘉嘆以深。

又

朕傷時俗之薄。仁愛德政。不能以一化也。故刑者將以靖民。然而罰不勝罪。而日愈滋矣。朕以天下斷獄。當論廷尉者。靡不親閱之一歲之讞。至于屢空。非爾奉職之效歟。與冒褒嘆。豈忘于懷。

又

夫法者治之正。所以禁暴而衛善人。朕閱律令煩多。吏或巧詆。以權元元之無辜。故命廷尉之官。上下參讞之。庶幾平停天下之文。今重輕隨決。而靡不服厭人心。豈不近五聽三宥之意哉。書云。惟良折獄。罔非

在中。予惟汝嘉之。

又

古者畫衣冠而民不犯。朕甚慕之。厥後民日益薄。而法令之不可止也。雖然使刑不濫。而民心得其庶矣。夫今天下斷獄不可勝數。而上于廷尉者。隨卽決之。非明辨簡通。則未易臻此也。嘆賞之意。夢寐以之。

又

朕惟獄重事也。天下之繫。所不能決者。皆得奏而獻之。而廷尉之報。日以叢矣。汝持法詳平。乃不留獄。歲數來上。朕用嘉之。

又

朕閱天下之羈罪者衆。凡獄當獻者。皆聽上廷尉。而一歲之獻。至于屢空。非爾持法詳明之效歟。夫吏治辦而不見褒。何以其盡心焉。

又

朕惟自昔之用刑。必得之于簡。而失之于煩。蓋簡則主于恕。煩則使民無所措手足。此先王所以至慎也。汝等專法刑憲。而詳明區處。皆適其中。能使法之必行。而不至于煩。非爲職事之修乎。嘉獎之意。不忘于懷。

賜祕書丞館閣校勘陳繹進擬御試賦獎諭敕書

夫天地人之極。至蘊而莫能闕也。誠非王者睿明神知。則莫能兼覽而參化之。朕比措文創題。以臨試天下。承學之士。庶觀其所陳。卿才雋過人。退而作賦。欲朕傳五事以通三才。以要諸治亂之歸。夫豈特綴文之工歟。省披之際。以歎以嘉。

賜廣南東路轉運使董詢捉殺海賊獎諭敕書

朕德不能綏遠。致盜起海隅。害于行旅。歲久未平。汝以使者之任。能督部吏。用兵格鬪。斬首捕虜。厥功著焉。除惡輔民。嘉乃之舉。

賜梓州路轉運使韓瑋等減罷重難差役獎諭敕書

朕患今力役之不平。數下諸道。監司推其利害之原。將更制以便民。而久莫有應吾詔者。汝獨能盡心帥職。凡蠲去積弊。蓋十七八。執政爲朕言。其法可推行天下。朕維爾忠幹之實。不有褒賞。曷爲勤吏事之勸。

賜權提點廣南西路刑獄公事李師中等與水利獎諭敕書

昔秦命御史監郡史。錄鑿桂之靈渠。漢益浚之。以通漕嶺西。然其道狹而流壅。其後卒以堙廢。爾奉職于外。究興利源。鑄石疏流。役不留月。舟航之濟。自公及私。都水上功。不忘嘉歎。

賜知深州晃仲約爲野蠶成繭獎諭敕書

饒陽之區。蒙澤豐茂。野蠶成繭。布于桑郊。斷數機中。貢之王府。羣化所感。以膺厥祥。歸美于君。事嘉前史。興言嘆尚。曷維其忘。

賜知台州李順救濟水災獎諭敕書

臨海之邦。水忽暴溢。民之被害。朕甚憫焉。汝奉寄于州。而能繕完城壘。隄防之修。以安集于吾民。外臺列功。繼達予聽。顧不爾勞之嘉乎。

賜權知海州章誠獲軍賊獎諭敕書

日者徵巡之官。失于馭下。致起畔卒。欵驚海隅。汝職守鄰疆。力當賊銳。募徒應猝。擒捕有方。外臺列功。久而未省。再覽來牘。良深汝嘉。

賜定遠將軍張智常獲僞智高母弟獎諭敕書

夙以勇槩。表于衆人。嘗施逐寇之勞。兼篤嚮風之志。邊臣列效。良集嘉歎。

賜皇姪叔敖進南郊慶成頌獎諭敕書

汝席慶皇家。游心藝圃。陪嚴禋之薦玉。觀靈貺之昭廷。發爲辭藻之工。具贊聲明之度。省披之際。褒歎不忘。

賜集賢校理馮浩等進南郊慶成詩獎諭敕書

朕回歲習之祥。躬郊見之禮。維時秉文之彥。莫匪相祀之誠。遽鋪載于聲詩。能發揮于祀典。以昭甚盛之舉。以示無窮之傳。將順之深。嘉婉曷已。

賜保靜軍三軍將吏僧道百姓等除皇兄宗諤爲本鎮節度使示諭敕書

朕以宗諤席祖宗之休。篤兄弟之愛。眷言淮服之奧。適建威施之雄。按士民之素善。陶風化之甚美。聞褒近屬。想慰遐心。

賜鎮海軍三軍將吏僧道百姓等除富弼爲本鎮節度使示諭敕書

朕以富弼昔在先朝。嘗居上宰。肆纂承于丕祚。復登冠于幾廷。適斬藩翰之行。遂寵節旄之拜。已祗成命。諒慰輿情。

賜昭德軍三軍將吏僧道百姓等除曹偁爲本鎮節度使示諭敕書

朕以曹偁地處感藩。位聯台鼎。適紹休于邦祚。爰更寵于節旄。載惟昭德之封。實均全晉之奧。肇有定命。良慰興懷。

賜鎮寧軍三軍將吏僧道百姓等除曹偁爲本鎮節度使示諭敕書

朕以曹偁緒出元勳。地聯懿戚。顧宜勞于外閭。命徙節于鉅封。眷彼樂郊。居有雅俗。適登良翰。宜慰遐瞻。賜陝西諸州軍官吏將校僧道耆老百姓等遣韓絳往彼宣撫敕書

朕以關陝以西。城鎮相望。老弱罷于轉餉。卒吏淹于戍屯。時命輔臣。往宣朝指。究方隅之民隱。飭邊計于秋防。凡在撫循。並申眷相。

賜保平軍三軍將吏僧道百姓等除賈昌朝爲本鎮節度使示諭敕書

朕以賈昌朝。舊儀宰路。外歷帥垣。適班綍于治廷。游揚麾于鉅鎮。乃曉樂郊之俗。久陶寧世之風。聞拜耆英。想符輿望。

賜武康軍將吏僧道百姓等除李端愿爲本鎮節度使示諭敕書

朕以李端愿。襲重侯之序。惟外戚之英。比頒綍以告廷。遂擁旄而作鎮。瞻言封壤之奧。固有士民之蕃。久被化風。諒均輿慰。

賜集慶軍三軍將吏僧道百姓等除皇伯宗諤爲本鎮節度使示諭敕書

朕以宗諤。緒本皇支。望有賢德。懋建師節。以藩王家。顧彼上疆之饒。陶于風化之美。諒聞嘉命。彌慰輿情。賜武勝軍三軍將吏僧道百姓等除皇弟頤爲本鎮節度使示諭敕書

朕以頤。皇屬之英。先帝所愛。爰暨續承之始。茂稽封建之文。錫之大邦。屏我王室。旣協朝僉之稷。想符民望之愉。

賜安武軍三軍將吏僧道百姓等除郝質爲本鎮節度使示諭敕書

朕以郝質、乘將鉞之雄、總禁屯之重、屬受圖于帝極、更拜節于師壇、瞻彼樂郊、居有雅俗、適頒廷號、諒副民懷。

賜河陽三軍將吏僧道百姓等除曾公亮爲本鎮節度使示諭敕書

朕以曾公亮、先帝大臣、三朝舊宰、重抑老臣之請、特申幾務之勞、方移旆于上都、且分旄于巨鎮、眷言士吏、以暨軍民、聞孚號之已行、諒輿情之胥說。

賜奉安御容都知押班并內臣等茶藥敕書

汝肅奉辟儀、往安珍宇、甫宅衣冠之御、固多夙夜之勞、宜有寵頒、用將眷禮。

賜知府州折繼祖進御馬敕書

汝素守方隅、見推材武、忽馳章于軍府、爰驚駿于天閑、省閱之餘、嘉嘆不已。

又

汝保有世忠、以扞疆場、惕修邦貢、驚駿上閑、申念勤誠、靡忘褒賜。

賜知辰州寶舜卿進謝恩馬敕書

卿素推勇槩、屢撫邊衝、適進董于戎昭、當茂均于邦給、翊章宸幄、驚駿天閑、載省傾勤、弗忘嘉尚。

賜商州刺史解旦進馬敕書

汝參總戎昭會祇禋事首孚神惠并暨私庭述修貢儀馳上慶牘恪恭滋至嘆惋良多

賜解州刺史劉德進馬敕書

內提禁旅出總藩兵方按律于戎和遽飛函于邦貢載惟祇順良用嘆嘉

賜定州路副都都英宗廟諱李珣進端午馬敕書

汝比膺邦寄外領兵符適臨邊瑣之初遽有天閑之貢眷言祇順良用嘆嘉

賜諸路文武官吏等初冬衣襖敕書

寒律應期良裘登御興念宿官之勤卽頒在笥之華安煥是資眷勤兼至

又

愛景流空寒威應律念飭躬于邦事推賜服于朝彝眷起宸思恩回天煦

又

流景易遷寒風率至緬念從公之勳宜推賜服之常往被恩華益思忠厲

又

寒風厲物愛景臨郊有懷從事之勤爰舉賜衣之式其思恭慎以服恩華

賜諸路諸軍員寮等初冬衣襖敕書

歲律乘陰。邊隅勞戍。念訓師之是力。宜頒服之以時。益堅忠誠。用稱恩典。

又

氣應寒篇。禮登善裘。念訓長于軍和。實勤勞于戍守。並均安煖。用厚綏存。

又

嚴氣迎郊。淒風于物。申念戎和之長。並推邦禦之良。賜服均溫。勤躬念報。

又

城隅分守。冬律肇寒。念夙長于戎和。宜卽頒于歲具。勉思忠盡。祇答寵私。

又

服在師屯。捍我城障。適戒初寒之序。宜頒載煖之衣。益堅忠勞。庸答恩遇。

賜靜海軍節度使同中書門下平章事安南都護交趾郡王李日尊明堂加恩告敕敕書

朕攷古之意。乘秋之斂。涓成宗饗。昭輯上儀。羣心大和。丕應屢下。乃眷南顧。厥勤內輸。能纂世封。洊啟王土。肆予竣祀。樂爾蒙休。往膺寵章。益懋素守。

賜李日尊轉官告敕敕書

朕遙祗先訓。登續丕圖。享國之安。繫于成業。頒常之始。渙以至恩。眷爾保疆。勤夫述職。疇訓外圉。敷命大

廷勉服世忠永綏邦寵

賜李日尊進象敕書

省所上表差人進奉具悉卿保有南裔列爲外藩屬疆事之就寧馳奏函而申款遐修方貢洊篤世忠載諒傾輸靡忘嘆獎

賜李日尊進金帛犀象敕書

朕紹膺丕命奄宅多方睠世守于南陬能首虔于內貢載覽剡封之至有嘉述職之勤宜被寵頒且昭厚遇

賜靜海軍節度使同中書門下平章事安南都護南平王李日尊麻日敕書

朕稽古凝猷揆天作麻凡舟車之所泊皆正朔之所加適更歲令之端恭正人時之授勉經民務用迪邦彝今賜熙寧四年麻日一卷至可領也

賜于闐國王進胡錦并玉等敕書

省所差人進奉具悉卿介居西裔邈去中朝夙馳慕于化風遽入輸于邦貢名昭往牒義勳殊方申念虔誠靡忘嘉獎

賜于闐國宰相進胡錦并玉等敕書

汝馳名遐裔。慕化中區。因信介之爰臻。列貢函而來上。有懷祇順。良集褒嘉。

賜諸路蕃部溪洞初冬時服敕書

善守世封。紹修邦貢。屬迎寒之初候。稽頒服之舊章。式示寵休。用嘉忠嚮。

又

汝撫封雖遐。述職不懈。洊歷瑾扉之候。往頒在笥之衣。恩煦是均。忠勤更篤。

又

汝夙表種豪。洊綏世守。方履凝嚴之序。載均安燠之衣。其篤順成。庸欽嘉賜。

又

汝夙以材能。長于區落。方履初寒之序。式頒載燠之衣。往勵素誠。用祇嘉寵。

賜大渡河南印部川山前山後百蠻首領賀登寶位進方物敕書

地控遐陬。心馳上國。屬肇膺于邦統。特致貢于物宜。言念傾勤。靡忘嘆矚。

賜溪洞彭仕義賀登寶位進方物敕書

省所進奉。具悉。朕駿膺天命。欽紹邦圖。眷惟谿落之豪。咸上風宜之貢。載循忠嚮。良用寵嘉。

賜彭仕義賀冬進方物敕書

汝早以材豪。長于陬落。能篤邦風之慕。式修歲貢之常。申念傾勤。靡忘褒嘆。

賜知龍州彭師贊進方物敕書

汝生于遐裔。陶以太和。游行朝寵之華。益大世封之守。支輸方物。以謹邦彝。載諒爾勤。有嘉予嘆。

賜溪洞楊光潛進方物敕書

汝遐居夷徼。善長衆豪。既率境以嚮風。爰因時而述貢。載惟祇順。良積褒嘉。

賜五臺山十寺僧正等進功德疏獎諭敕書

省所進來新正功德疏事。具悉。五峙之峰。金繩滿果。度門之衆。口誦真文。歲元首和。歸祝皇歷。亮爾恭嚮。有嘉予懷。

又

雁門之勝。山峙五峰。寶刹連雲。應佛眞迹。諦文滿義。日導迷途。歲集善因。不忘嘉嚮。

又

名峰列峙。寶刹相望。因獻歲之導和。復誕辰之紀慶。歸度大覺。徧譯眞文。載念勤修。靡忘嘉歎。

又

爾時佛言。大慧諸識。有生住滅之種。夫性生住滅之種。非佛了性。去來皆是因緣。則諸衆生。盡無明見。不

可嚮福。故佛從種種地方來作慧境界。隨所應度。隨所應見。而爲普見。不可思議。今師往五臺十寺寶佛
昔住之處。能率諸大弟子。咸起信心。修如是行。復使衆生知佛之去來。應如是法。作無量功德。善哉善哉。

華陽集卷二十

內制

賜文武百寮宰臣以下賀明堂禮成批荅

朕乘季秋之良。修大饗之事。歷禋清廟。升烟紫旻。景氣晏溫。福瑞紛委。羣志飾盡。上靈居歆。卿等預秉化均。相容祀典。忽慶函之來蔭。述熙事之備成。舉繁汝能。顧匪台德。所賀知。

明堂禮成文德殿文武百寮宰臣以下稱賀批荅

朕涓吉季秋。肆禋上帝。格孝思于清廟。配文德于總章。相維辟公之儀。宜有夙夜之勤。迨成熙典。均錫嘉祥。與卿等內外同慶。

明堂禮成文德殿樞密使以下稱賀批荅

朕三歲親祠。季秋大饗。緝遺文于曠古。振能事于熙辰。肅然上下之通。顯有左右之助。邦儀就緒。神錫均釐。此下同前篇。

宣德門肆赦文武百寮宰臣以下稱賀批荅

朕躬臨泰時。旣交肸蠭之靈。還御端闈。遂肆龐鴻之澤。上儀丕就。百福來綏。凡在搢紳。因同慶抃。

賜宰臣韓琦以下賀老人星出見批荅

春乘歲筭。當中氣之未分。星直天弧。已高芒之在夕。載攷常占之度。實爲豫告之符。嘉應之來。予心增惕。卿等協修邦事。昭發乾文。願軼瑞于靈篇。願傳休于信牒。旅函來上。欽嘆良深。所賀知。仍依奏宣付史館。

又

西顯肅物。秋陰始中。南極耀芒。夜漏將旦。炳然象載之列。告厥壽祺之昌。披圖以占。懼德非稱。卿等協襄政路。助變辰階。刻章在廷。歸福于上。宜垂史牒。永煥時休。

又

夫天監雖高。蓋陽威則不旋日。君道匪易。若德隆則能曷星。乃顯氣凝于商中。辟芒煜于弧外。渾史告異。占之象。弼臣慶曼壽之祥。豈獨化之能然。亦交修之致此。事昭竹帛。將垂不泯之觀。義篤股肱。還奉來同之祉。載循褒牘。益厲忱思。此下同前篇
後六篇並同。

又

氣分秋籥。瑞著星躔。于國爲壽考之符。在民見治平之象。丕荷靈孚之發。益循菲德之兢。屬占歷之告祥。遽列章爲歸美。不遐有佐。旣均神祚之承。無疆惟休。又永信書之載。省披之際。欽嘆良多。

又

素幃御節。適臨秋籥之中。景緯躔空。忽直天弧之北。時之丕應。豈獨在予。卿等率服大僚。預調元化。按靈篇而歸德。議史載之流徽。省牘之餘。以嘉以媿。

賜宰臣富弼以下賀壽星出見批荅

西郊肅物。適臨秋籥之中。南極騰輝。忽告星躔之瑞。既表人君之壽。又符天下之安。其驗焯然。何德臻此。卿等履具瞻之地。調萬化之元。導民氣之至和。動乾文之體應。歸上之美。亮乃之衷。宜記信辭。共承丕貺。賜樞密使宋庠以下賀壽星出見批荅

灝氣中分。舒靈幾望。維清臺之占度。見南極之騰芒。載稽瑞牒之文。實表皇圖之固。卿等任均鼎席。謀總機廷。輯于二邊之事。陶茲羣物之豫。仰動乾緯。發爲休符。參形歸美之章。共被與齡之貺。天之祐順。史無愧書。

賜樞密使文彥博以下賀壽星出見批荅

玉筯凝商。適履秋分之後。珠躔麗極。遽騰天社之南。雖歷攷于祥占。豈獨孚于眇德。顧倚宥謀之重。助裁神化之宜。致順象之來符。將信書之具紀。載披需奏。良集媿懷。

賜樞密副使胡宿以下賀壽星出見批荅

夫王者修飭五事。以當天心。則必有休美之符。發于辰象。以表顯之。朕顧德不明。惟舉錯之靡中。乃庚子

之晨。祥星著見。非吾股肱大臣。篤躬興化之應歟。詩云。受天之命。四方來賀。於萬斯年。不遐有佐。朕敢專饗其福哉。

賜文武百寮宰臣韓琦以下乞立壽聖節宜允批荅

赤制告圖。肇承題序。青煒勳陸。俯協誕期。卿等過稽舊章。列上芳牘。緣華封之素祝。建壽聖之嘉名。竊惟受天元符。撫國休運。百辟稱觴。而在席。四夷奉幣。而在廷。敢以菲懷。抑于輿望。所請宜允。

賜文武百寮宰臣韓琦以下乞聽政第一表不允批荅

夫以朕眇末之身。遭國大故。孀孀在疚。若無所容。而有司列章。遽以聽事爲請。夫三年之喪。猶未成服。乃欲臨便殿見羣臣。其可得乎。所請宜不允。

賜文武百寮宰臣韓琦以下乞聽政第三表宜允批荅

朕奉先帝顧命。以付畀四方。夙夜憂懼。若涉淵冰。今雖悲哀之中。不敢違公卿大夫之言。以起圖事。然而斷恩從變。不亦喪紀之薄乎。所請宜允。

賜文武百寮宰臣韓琦以下請御正殿第一表不允批荅

朕離國之憂不及行。高宗諒陰之事。固已慙然于懷。今易日而除。公卿大夫欲朕御大昕之朝。以延見羣臣。朕哀荒未究。鬱于大道。將何以處之哉。所請宜不允。

賜文武百寮宰臣韓琦以下請御正殿第二表不允批荅

予離國大憂。而不能執三年之通喪。蓋已徇公卿大夫之言。日從事于便坐矣。今復俾予臨正朝。以垂聽天下之治。顧羶然而哀不勝。雖曰祖宗之故事。豈予小子所敢循乎。所請宜不允。

賜文武百寮宰臣韓琦以下請御正殿第三表宜允批荅

夫喪親者。自天子至于庶人。禮不敢偷也。予遭家之難。茹懷荼苦。朝夕靡勝。卿等乃謂國之萬幾。不可以曠日。至三陳悃悃之言。顧雖弗從。然祖宗之制。庸可廢乎。所請宜允。

賜文武百寮宰臣韓琦以下乞舉樂第二表不允批荅

朕荷顧言之重。保成業之艱。躬信默以永思。奉燕詒而終裕。施大曷報。創深靡窮。且宮隙流陰。俯順縞織之變。而賓觴在御。忍聞金石之音。攬封奏之爰來。握禮文而甚備。顧于菲德。誠所未安。所請宜不允。

賜文武百寮宰臣富弼以下請御正殿復常膳舉樂第四表不允批荅

朕顧德薄。不能致陰陽之和。而災異比下。害于予民。故避殿損膳。徹在廷之音。庶幾人事修。而天意得也。雖嘉澤適應。然驕陽旋興。側身永思。重懷慘結。卿等乃露章繼至。願復其常。朕方恭天之渝。不敢以馳驅也。所請宜不允。

賜文武百寮宰臣韓琦以下上尊號第一表不允批荅

朕獲承大統。三載于茲。蒙天之休。海內事靜。方將飭齊輅。潔純犧。以祇見天地宗廟之靈。乃敢昭發丕冊。揚徽垂鴻。以自施乎尊榮者哉。不圖執事之臣。列上表功之號。且臨政之日淺。未有盛烈之章。況事神之意。豈在彌文之飾。適增予媿。難徇所陳。所請宜不允。

賜文武百寮宰臣韓琦以下上尊號第三表不允批荅

朕守神器之重。思王業之難。歷日未長。涉道猶淺。而三事庶尹。摺紳之倫。殊鄰異俗。霜露所墜。咸徘徊闕廷。願得鑲寶文章。鴻鏤以游。無窮之休。茲甚盛德。顧何足以堪之。竊嘗覽前世之載。近事之實。惟至聖爲能兼天下之徽。惟至功爲能襲天下之報。慎微端始。莫或敢承。所請宜不允。

賜文武百寮宰臣韓琦以下上尊號第四表不允批荅

昔夏禹不自矜能。而閔三代之聲。漢光戒諸言聖。而振東京之烈。朕願循菲德。膺守丕圖。亦嘗遠覽其所未形。積思其所不及。蓋謙恭抑畏者。靡不受多福。夸浮侈大者。靡不蹈後虞。今就陽初郊。假廟始禩。大懼無以薦四時之和氣。來萬國之歡心。乃欲仰摹祖宗之烈光。過跡金石之絕記。祇登寶冊。駿騰徽稱。豈朕所以荅三神之休。法後王之意哉。雖情見忠者之謂報。然文滋美者未易承也。所請宜不允。

賜文武百寮宰臣韓琦以下上尊號第五表不允斷來章批荅

朕接神明之統。享平富之圖。且三歲親郊。始嚴盡物之報。而百辟進旅。率籲在廷之言。攷前世之遺聞。摹

本朝之故事。將合羣靈之祉。游敷不冊之名。封章五陳。勤懇一志。然自躬庶政。降異相仍。永惟前王。跂德不及。載視瑣涼之質。難居尊美之稱。雖欲勉從。良不可得。所請宜不允。

賜文武百寮宰臣韓琦以下賀災異消復批荅

朕嗣守大器。述懷永圖。叢然萬務之微。居若一心之懼。乃菲德于異。方春爽和。陰賴祖宗之靈。顯膺天地之施。蒙氣遽釋。美祥大來。眷官師之造庭。露章牘之臨几。慶逢復旦之會。忠發愛君之辭。言念肅勤。靡忘欣歎。所賀知。

賜宰臣韓琦雨災乞退第一表不允批荅

蓋聞天右王者。故災異數下。以譴告之。顧德不明。蒙淫雨之罰。水泉涌出。壞民室廬。朕甚懼焉。方反躬念愆。思有以蒼天之戒。而正陽顯見。感不旋日。豈特朕力之致哉。誠股肱大臣。飭正萬事之應也。書不云乎。百姓有過。在予一人。何遽上書。欲上大丞相印綬。漠然予心。將何寄焉。所請宜不允。

賜韓琦雨災乞退第二表不允斷來章批荅

朕接隆平之序。懷寅畏之心。迺素秋之甫成。忽淫雨之暴降。然止于近郊。則顧其害靡大。彌于再宿。則迹其感不遲。今人事之已修。天變之已返。而猶據災而引咎。援放而辭權。雖蹈夫聖賢遠覽之思。殆謬于君臣交儆之意。書云。勅天之命。方俟咎繇之歌。詩曰。畏天之威。始安文王之道。勉規弗及。終底于休。所請宜

不允。

賜韓琦雨災乞退第三表不允斷來章批荅

堯被襄陵之災。終勤于稽古。湯離剪爪之患。猶勉于承天。朕不能跋二帝之功。摹三王之迹。而陰陽之靡順。風雨之不時。未飭厥事之違。乃歸有司之責。如是則繆于疇采。空興四嶽之嗟。忘于緩人。孤式九圍之命。尙靳丕應。宜弭來封。所請宜不允。

賜參知政事歐陽脩雨災乞退第一表不允批荅

災異者。天地之所戒也。朕德薄致咎。淫雨暴作。下民昏墊。離于非辜。深維轡悼。未識厥序。非夫一二股肱之良。以交儆予違。則信宿之間。休氣來應。未易臻此。經不云乎。萬方有罪。罪在朕躬。卿何疑而上書。乃引變辭位。三復之際。予心惓然。所請宜不允。

賜歐陽脩雨災乞退第二表不允斷來章批荅

朕推鴻範之文。貌不恭則常雨致厥罰。采漢儒之所論。遇有德則大水乘厥災。故天變之所從。皆人事之所召。豈朕失奉神臨人之肅。忘尊賢汲善之勤。乃伏陰沴辰。淫潦暴物。始圖銷異之術。爰下責躬之書。煩詰輔之興言。引裁符而避位。況積流收壑。訖無病涉之虞。翳景澄秋。猶有登農之望。往其助始。終以蒙成。所請宜不允。

賜歐陽脩雨災乞退第三表不允斷來章批荅

夫治邦不飭則必致四序之失和。天譴之來。又將儆一人之興德。今順氣靡洽。淫潦爲災。重循不穀之繇。方厭已然之效。眷言近輔。迭上奏函。更推變異之原。自引寵榮之戒。且君臣相勸。當圖庶事之康。而暘燠以時。終底九疇之義。載惟冲避。曷應靈承。所請宜不允。

賜參知政事趙概雨災乞退第一表不允批荅

夫災祥之應。亶如影響之隨。言貌之違。倏致雨暘之變。朕茂膺不命。祇憲先猷。顧邦治之未孚。感天恩之再至。迺煩碩輔。引咎興言。載循菲躬。望古盈愧。矧至精仰格。甫銷沴氣之原。而感德交修。終濟不平之務。欲辭厥位。豈副予懷。所請宜不允。

賜趙概雨災乞退第二表不允斷來章批荅

夫天之篤佑王者。自非大失道。盡欲扶持而全安之。災變之來。初莫不恐懼。已則晏然以自若。豈所謂荅天之實哉。比者淫雨之作。咎流萬民。朕甚懼之。今大異甫銷。思與輔政之臣。益圖所以興治之本。以上當天心。卿乃引災自言。而懷去位之計。朕何望焉。所請宜不允。

賜趙概雨災乞退第三表不允斷來章批荅

比以天序失和。秋霖暴至。顧德弗類。側身靡寧。而卿居預政之司。悼爲民之害。屢引陰陽之變。欲還爵秩。

之榮。且永初之推咎台衡。豈足銷于天咎。樂安之不僭禮義。尙何畏于人言。益陳乃謀。用鑒不逮。所請宜不允。

賜宰臣曾公亮雨災乞退第一表不允批荅

朕迹災變之繇。率緣象類。而至格休平之應。莫匪誠忱之通。比積陰以鑿和。乃淫雨之降。儼稼穡卒瘁于近甸。室廬幾潰于橫流。方責躬以永思。俄導順而來復。欽惟元德之宰。惕奉明威之臨。外協釐于庶工。內輔飭于五事。奚列章而自咎。欲謝寵以爲安。且堯沴九年。未聞去位之佐。而宋災一國。猶興罪己之言。過實在予。疑何及此。所請宜不允。

賜曾公亮雨災乞退第三表不允斷來章批荅

天人之交。其微可畏。陰陽之沴。厥罰有來。自淫雨之下祥。已高穹之返聽。申眷弼疑之任。重懲譴異之由。欲避位于鼎司。數置章于軍府。無流民之謫。而過援石慶之歸。非愆陽之災。而固引祖榮之咎。在于菲德。良亦非懷。所請宜不允。

賜曾公亮地震水災乞退第二表不允斷來章批荅

朕獲保宗朝。夙夜祗畏。顧德不能綏天下。乃甲申地震。河朔大水。壓覆人民。朕甚懼焉。卿三朝社稷之臣。方共圖所以應變之術。奚遽上書而引咎也。昔我文考。嘗因天異。下罪己之詔。而不敢督過大臣。矧予小

子不勅躬自思。乃敢聽丞相避位哉。所請宜不允。

賜曾公亮旱災乞退第一表不允斷來章批荅

朕迹災祥之來。緣政教而起。乃大河之北。民饑洊臻。三輔之交。歲曠靡已。宿麥將瘁。嘉穀未敷。方佇雲霓之興。敢愛牲璧之舉。而卿內修政事。上格天心。忽時澤之應祈。已農疇之盈望。猶煩需牘。遂欲辭權。雖嘉引咎之恭。未體仰成之意。所請宜不允。

華陽集卷二十一

內制

賜皇長子淮陽郡王頊免恩命不允批荅

昔我祖宗。誕受天命。厥惟艱哉。克正皇猷。丕懋乃績。以遺我子孫無疆之休。今朕纂厥服。惟稽古建爾元子于有邦。乃季秋辛亥。羣公庶尹。罔不祗朕言于廷。爾乃陳德弗及。期畀于一二弟兄之賢。我聞曰。立愛惟親。立敬惟長。其敢示天下以私乎。汝惟往哉。尙迪時命無違。所辭宜不允。

賜皇長子穎王頊免恩命第一表不允批荅

夫三代之裂土也。雖兼胙之親賢。春秋之命子也。曾莫踰于適長。蓋上以尊夫宗廟。內以屏于王家。眷于冢嗣之良。比有近藩之建。且德義滋立。而寵命未隆。宜先同好之盟。遂享眞王之爵。朕履夫尊極。豈不念父子之至親。質之僉謀。時則有祖宗之故事。露章忽至。秉節自陳。雖高難進之風。莫反已行之命。所辭宜不允。

賜皇子東郡王顯免恩命第一表不允批荅

周之同宗。並建藩屏。漢之諸子。多留京師。朕欽天序之承。厚人倫之愛。從爾外傳。以勉先訓之聞。昨爾南

邦以爲夾輔之固。忽馳上于需牘。願收還于渙音。事出公僉。理難沖避。所辭宜不允。

賜皇伯祖承亮改封秦國公免恩命不允批荅

夫戚藩之建。王室是毗。古者皆世襲其封。近代或別予之邑。旣非祖烈之服。又失廟祠之傳。故朕推近屬之長賢。修先王之舊履。以大子孫不絕之序。以均宗社無窮之休。適攬露章。過形沖節。宜體親親之意。庸光繼繼之圖。所免宜不允。

賜皇伯崇信軍節度使宗旦免恩命第二表不允斷來章批荅

時我伯父。望爲宗英。適稽牒以攷年。已頒朝而加命。奚煩上牘。疊欲還恩。且國家隆骨肉之親。而天子厲爵祿之枋。令下莫反。義當則承。所免宜不允。

賜皇伯使相宗諤免恩命第一表不允批荅

朕猥以眇冲。膺于統序。肇臨庶政。先錄近親。肆敷大廷。抑本舊典。奚煩謙挹。以格澤煒。所免宜不允。

賜皇伯宗諤免恩命第二表不允斷來章批荅

夫倬敍者。聖人之大義。名器者。天下之至公。屬予踐阼之初。首沛合親之澤。顧僉謀之罔咈。豈菲德之敢私。雖諒攜懷。難俞確避。所免宜不允。

賜皇伯宗諤免恩命第一表不允批荅

在昔帝王何嘗不崇建藩戚以用自承助乎。今骨肉多而爵位隆顯者少。不稱朕所以廣彊本支之意。矧我伯父之尊。舊惟作相。豈久而不復哉。尙何遽巡以稽在廷之休命。所免宜不允。

賜皇伯宗諤免恩命第二表不允斷來章批荅

朕繼成基序。思大本支。載惟燕翼之所承。常慮仁恩之不至。矧我近屬冠于列藩。適還上鉉之章。已布大廷之聽。奚煩需牘。固執摛情。其往位于鴻樞。尙永毗于皇室。所免宜不允。

賜皇伯使相宗樸免恩命第一表不允批荅

古者祀有執膺。歸于同姓之國。所以見愛也。矧予伯父侍祠在郊。而秉德嘉栗。實相厥成。顧無神惠之報乎。乃乙未之命。詢謀大同。毋爲過辭。以稽我上帝之貺。所免宜不允。

賜皇伯宗樸免恩命第二表不允斷來章批荅

朕蒙祖宗之休。守天下大器。稟稟如不勝。乃仲冬景至。獲祠上帝于嘉壇。屑然若神靈之下。賜之福祿也。禮成熙明。朕不敢以專饗嘉。與叔父共承之。何屢辭焉。所免宜不允。

賜皇弟岐王顯免恩命第二表不允斷來章批荅

向以先園興事。同軌戒期。迫遵疊聖之彝。阻從大升之駕。申念天倫之愛。夙陪仙御之行。因發感懷。肆加渙命。雖攬固辭之牘。難停誕告之文。所免宜不允。

賜皇弟樂安郡王頽免恩命第一表不允批荅

夫立愛惟親人道之大也。朕蒙休先帝託于士民之上。惟王親慈同生。可弗見愛乎。王雖在憂哀。而封爵之拜。固嘗博議于有司。其勉承之。毋廢朕顯命。所免宜不允。

賜皇弟樂安郡王頽免恩命第二表不允批荅

朕奄遘大艱。不及行高宗諒陰之制。王乃退執憂之三年。可謂孝子之事終矣。封建之命。朝廷錫之。王庸勿辭。所免宜不允。

賜皇弟高密郡王頽免恩命第二表不允斷來章批荅

朕以眇德。遺大投艱。弟兄急難。莫如予愛。原陵終事。感至形恩。搢章雖來。莫徇而請。所免宜不允。

賜宰臣韓琦免恩命不允批荅

夫王者一天下之俗。宰臣遂萬物之宜。故君臣同德而教化成。朝廷上賢則分職治。肆朕承邦之久。得卿共政之均。且國用失浮。規節財力之匪易。吏塗過冗。甄序名器之爲難。歷勤勞之百爲。蹈夷險之一致。向屬冢卿之缺。適登台席之元。稽卜神謀。孚言朝聽。維百辟之是式。維兆民之是瞻。奚與曲讓之辭。殊闕大公之舉。慷慨衆志。鬱于予聞。蓋德盛而位隆者。望雖與歸。然任劇而責至。則事當隨決。思體瞻毗之異。祈收撝固之情。往代天工。毋留邦渙。所免宜不允。

賜韓琦免明堂恩命不允批荅

予臨路寢之上。曾覽八紘。邈然有通神明之志。乃季秋宗祀。既右上帝。亦右文考。始予齋精臨獻而懼不勝。及觀夫簠樽在堂。鐘石在庭。至陟降上下之數。與夫九州四海。美物之薦。罔不具飭。噫。何其禮之盛歟。非爾元宰之臣。孰總裁之。故已未之制。爲百辟先。亦皇天降休命于我家。非予之所敢專也。今書固辭。顧不廢惠術之施乎。所免宜不允。

賜韓琦免明堂恩命第一表不允批荅

朕歷吉季秋。徧祭五室。薦豆籩之和氣。陳禮樂之盛容。神明顧懷。福嘏綏輯。肆于熙事之就。莫匪嘉謨之將。渙發鴻休。茂旌元弼。奚爲章牘之至。乃有封爵之辭。雖亮中懷。敢專靈貺。所免宜不允。

賜宰臣韓琦免南郊恩命第一表不允批荅

朕欽膺皇歷。肇舉元禋。就神陝之積高。奉嘉籩而薦氣。陰霾夕卷。瑞景朝凝。顧非顯相之孚。疇底休成之應。蓋禮鉅者澤究。勞深則爵尊。奚遜牘之遽陳。終渙音之莫復。所免宜不允。

賜韓琦免南郊恩命第二表不允斷來章批荅

朕以辛未明發。飭齋路于郊越。仲冬景至。蒙休燎之氣香。予秉文之輔。莫匪在祀之恪。故泰元之策。具契三神之歡。而盟府之書。昇先百寮之冠。維靈施之不可緩。維廷渙之不可還。何据德之益冲。猶封章而渚

至衆竢而舉。獨非可辭。所免宜不允。

賜韓琦免恩命第一表不允批荅

朕猥以眇質。獲承至尊。初攬萬幾。未昭大道。咨爾元輔。濟予丕圖。班號在廷。議勞有典。奚煩沖避。以闕巖瞻。所免宜不允。

賜韓琦免恩命第二表不允斷來章批荅

卿股肱大臣。先帝嘗所改容而禮之也。朕蒙遺德休烈。旣已布澤四海之遐。矧定策禁中。以安社稷。褒功賦爵。庸敢後乎。宜勿重辭。以稽我大廷之命。所免宜不允。

賜韓琦免恩命第三表不允批荅

朕伏觀乾興詔書。受遺之臣。咸進位二等。卿先帝所屬。以輔眇躬。而卽阼之恩。未加厚也。矧予哀荒在疚。而卿憂勞國事。夙夜以之。豈若先時之比乎。夫德至而寵未報。朕甚惡焉。戊辰之命。其祗勿辭。所免宜不允。

賜判相州韓琦免恩命第一表不允批荅

夫爵傳功。則天下皆勸。名當分。則君子不辭。朕攷祖宗之時。公相之迹。雖有疊入輔佐之老。而無三歷難虞之臣。今卿功就而不居。任隆而又損。其始去位。誠懼恩禮之未昭。奚爲上書。猶懷謙畏之靡已。矧易大

廷之號聽還兩鎮之旄。倘復殺恩庸何稱德。所免宜不允。

賜宰臣韓琦乞退第一表不允批荅

朕槩覽載籍。緬懷前人。周召終勤于孺子之朝。皋夔豈去夫九官之位。蓋欲垂世者篤之于行道。本愛君者要之于盡忠。維時上宰之賢。實乃先帝所遺。甄序羣品。若衡倚平。詢質大疑。如龜獻兆。朕方積思于諒闇。委成于謨明。遽聞欲去之言。深駭無因而至。豈朕鬱于大道。未昭治亂之原。將卿保其成功。自潔進退之分。夙夜惟念。予心惘然。所乞宜不允。

賜韓琦乞退第二表不允批荅

卿先帝大臣。遣以輔朕。勤勞夙夜。于茲三年。今郊祠甫竣。乃露章自列。謂陰陽弗序。則朕拜貺之辰。何其順氣之不塞乎。謂戎羯弗馴。則朕親政以來。惡有邊寇之深入乎。況民未聞失職。官不見墮事。卿奚過思其所不及。固欲以去朕哉。此朕所以當夕而不寐也。夫宰相之進退。繫國家之安危。朕其敢忽諸。所乞宜不允。

賜韓琦乞退第三表不允斷來章批荅

夫良宰謀朝。如執金石之固。忠臣衛主。何憚風波之虞。卿位總百寮。而無墮工。事更疊朝。而無遺策。屬朕遭家多難。享國日淺。仗顧命之元老。寄皇圖于大治。而忽求自免。匪憚予聞。矧召公之歷三朝。未聞辭位。

之事。伊陟之格上帝。豈及徇身之謀。無復重陳。庶安仄念。所乞宜不允。

賜樞密使富弼免恩命第一表不允批荅

夫有府經王之武事。台司導國之化元。安危出于大謀。左右屬之同體。維卿命相先帝。竭精靡遺。鍾釐而家。甄禮莫奪。肆纂丕圖之始。旋聞喪紀之終。戒馳使輶。召冠樞幄。矧國哀之未究。實邦務之所咨。奚達讓困。乃留渙檢。名之適分。誼可去辭。所免宜不允。

賜富弼免恩命第二表不允斷來章批荅

夫天下雖無事。敢忽備于不虞。王者之有征。在制師于必勝。謀我兵本。倚之樞臣。早負大名。寢膺重任。文足以緯皇業。武足以豐天威。去以終喪。靡徇權宜之事。起而復位。又陳謙讓之辭。雖諒至懷。莫遠定命。所免宜不允。

賜判河陽富弼免恩命第一表不允批荅

卿躬上賢之資。負絕俗之見。挺大節以自守。履盛名而弗居。固辭機務之勞。甫遂藩符之佚。姑徇素欲。奚底搆文。所免宜不允。

賜宰臣富弼乞退第一表不允批荅

夫抱大材者。天下之譽歸。履大任者。四方之責至。故譽之所隆。非篤已濟民之略著。則不足以垂永休。責

之所重。非忘身徇國之事興。則不足以經至治。維爾以奇文大冊。寢歷顯塗。偉節閎謀。遂登上輔。靡幾微之不緯。罔遐末之弗熙。迺言起憲臺。章留宸几。蓋主議論者。以是非之繫。必析每聞之情。然秉政事者。以利害之參。當求今務之適。誠究原于異體。維跂德于至平。奚爲函牘之來。遽決進退之分。且正則不私于物。忠則不顧于時。茲朕意之雅圖。豈人言之足恤。宜收沖挹。以輯眷懷。所乞宜不允。

賜宰臣富弼乞退不允批荅

朕肇履邦圖。每恭天戒。屬初炎之在序。偶時澤之弗滋。且上于近畿。顧民災之未遠。然應不旋日。知人事之已修。卿還來相予。居位未久。奚抗章而引咎。將援故而辭權。雖蹈夫聖賢遠覽之思。殆戾于君臣交儆之意。勉規弗及。終底于成。所乞宜不允。

賜樞密副使歐陽脩免恩命不允斷來章批荅

天之北樞。通位帝紀。國之右府。總制兵謀。以成敗之機。故慎于圖事。維憂責之重。則要之得人。適登髦傑之材。參亮承疑之寄。矧沈畫足以制千里之勝。精識足以造萬事之微。甫經務以會神。忽露章而辭寵。顧至公之是進。復羣美之所歸。汝德實諧。朕言豈再。所乞宜不允。

賜參知政事歐陽脩免恩命不允斷來章批荅

卿才粹宇閎。文醇論正。擢自禁林之從。登于樞密之司。收帷幄之先謀。導夙夜之密命。方懋施于賢蘊。庸

更貳于政均。迺達讓函。未昭物聽。且士之難進。雖識風節之高。然朝之與能。必當名器之分。宜略文而之厚。遂體道以爲公。厥服大僚。以毗至化。所讓宜不允。

賜歐陽脩乞退不允批荅

夫預政之途。蓋天下之責至者叢矣。顧雖智勇。不能以禦流訾之來。前日御史加非于卿。朕惟其辭甚悖于義理之文。今讒者放。而疑者釋。卿猶欲以去位。豈朕所望焉。傳不云乎。禮義不愆。何恤于人言。其起眤事。毋重朕之不敏也。所乞宜不允。

賜歐陽脩再乞退表不允斷來章批荅

朕歷覽聖賢之迹。槩見君臣之方。蓋合一德者。固不能爲浮辭所移。躬絕節者。或未可應羣物之用。朕臨位未久。悼道弗明。方倚大臣同心之謀。以經千載不世之治。而卿數懷欲去之計。自嗜獨高之風。豈不念先帝委政之甚勤。又將詒沖人遇賢之靡篤。往收前慮。訖濟大忠。所乞宜不允。

賜參知政事歐陽脩乞退第一表不允批荅

朕猥承先猷。適履多難。朝廢食以思道。夜振衣而慮危。而卿秉喆在朝。勞精共政。忽露章而滋至。迺引疾以爲言。豈邦論所拘。猶抑非常之冊。將台德弗類。自懷欲去之謀。如其不然。何以至此。顧被遇于文考。終輔成于沖人。往宅厥常。毋易而舉。所乞宜不允。

賜歐陽脩乞退第二表不允批荅

夫朝廷正。則羣駿遊。君臣交。則大治起。予欲上追二帝之盛。近摹四聖之休。且夙夜以思。惟懼弗至。而左右之倚。遽陳不能。雖懷君子獨行之高。頗謬二人同心之利。豈邦事之未正。主道之不交。則卿何陳輕去之辭。專屬難進之節。顧省厥理。茫然靡圖。所乞宜不允。

賜歐陽脩乞退第三表不允斷來章批荅

朕蒙先帝遺烈。獲承至尊。夙夜震畏。不敢荒寧。乃去秋以來。敵數內寇。邊事靡飭。被害有象。方春東作。民至乏食。流離道路。不能自存。朕方勉思其所不及。而預政之臣。乃圖欲以去。朕豈所望焉。書不云乎。股肱喜哉。元首起哉。卿其往綏厥位。終厥德。亦尙一人之慶。所乞宜不允。

華陽集卷二十二

內制

賜判鄭州宋庠免恩命第一表不允批荅

夫上憲紫樞。以道萬微之命。外圖良翰。以宣庶政之和。蓋重朝刑。俗以體均。豈遇賢宅。謀之禮異。日者。瞻卿老成之望。賦子機事之元。憂勤百爲。醇亮一節。力謝權而就逸。嘉戒滿之若冲。聽守陪藩之封。寵分台鉞之拜。命已孚于羣聽。章猶露于至懷。矧左右之前咨。方安危之中注。往膺明制。終翼丕圖。所免宜不允。賜宋庠免恩命第二表不允斷來章批荅

夫履大任者。必形于勳德之茂。襲元老者。必賦以爵祿之尊。維卿奮業儒宗。凝猷天緯。屬四方無事。則廟勝之自高。復羣父在庭。則邦維之日緝。奚言流誓之及。願解宥謨之煩。素倚策于綏平。愈亮懷于忠實。誠辭屢至。風槩靡羣。付節三城之雄。就藩百里之近。雖將牙之專令。見台路之同熙。況蒙成萬機。固嘗圖夙夜之勤。更宰二枋。豈不經文武之謀。已恩綽之專朝。猶讓函之累進。材而當寵。議亦從公。往服邦休。莫還宸渙。所免宜不允。

賜使相宋庠乞致仕不允斷來章批荅

朕甫躬萬幾。鬱于大道。實仰衆德。經之遠猷。卿舊弼之臣。先朝所器。向辭右府。屢寄于藩。肆纂丕圖。適還
在位。傳經議政。甘盤之學未親。緣寵退身。老氏之風何厲。露章三至。秉節一詞。雖欲進徇遺榮之高。顧不
終懷。白告之慕。往安乃服。毋悌予聞。所乞宜不允。

賜樞密使曾公亮免恩命第一表不允斷來章批荅

朕延寵邦英。倚諸國柄。矧陞聯于使號。實總制于戎幾。故先諏日之良。已布告廷之命。雖貪謀之允穆。猶
讓牘之繼陳。蓋謙畏者保躬之微。忠瘁者事國之大。載惟舊德。當迫遠猷。毋執沖懷。以稽明訓。所免宜不
允。

賜曾公亮免恩命第二表不允批荅

朕紹列聖之序。將用乂于我家。願元台之臣。數靡安于厥位。乃端命枚卜。灼求俊心。誕陟老成。表魁政舉。
〔案〕此下原
缺六字。實繫一時之瞻。其體仰成。無或淹拜。所免宜不允。

賜宰臣曾公亮免南郊恩命第一表不允批荅

朕猥以眇躬。託于王公之上。夙夜祗栗。懼不能荷。先帝遺烈。乃仲冬之序。獲將犧牲。以見天地宗廟。而神
靈顧歆。錫朕純嘏。非吾丞相秉德在祀之助歟。議勞之典。宜膺勿辭。所免宜不允。

賜曾公亮免南郊恩命第二表不允斷來章批荅

朕景至未明。承神嘉壇。肅然若風馬之來。方是之時。天景粹溫。福瑞並貺。信乎上帝百神之子歆也。內惟寡德。豈能獨致之哉。實維予相臣。夙夜齋精。以共濟茲舉也。祭者必有爵賞之施。以及其下。況國之元老乎。其勉承之。用孚于四海之聽。所辭宜不允。

賜宰臣曾公亮免恩命不允批荅

夫天文中階之象。色正則二氣鈞。國柄三事之司。體公則萬化輯。朕何嘗不寤寐邦傑。彌綸政機。以悼美風俗之原。以甄序官師之品。所繫甚大。維材之難。卿行足以厲朝。謀足以經國。代言二禁。而號令鼓乎羣動。賦政中畿。而神明照于宿姦。頃陪議于宰臣。旋冠謨于宥省。邦之維度。靡不舉。兵之紀律。靡不張。屬上台之進賢。宜右弼之膺寵。忽起舜庭之讓。未施鄭國之規。羣情鬱然。予心勞止。矧夫付安危之幾。則望豈云淺。當名器之分。則處之勿疑。所期廣猷慮以同寅。會精神而輔力。當抑謙風之固。往調大化之元。豈朕之獨致太平。亦卿之預有令聞。所免宜不允。

賜宰臣曾公亮乞退第一表不允批荅

朕居守成之統。有求治之心。日圖元老之臣。共起太平之務。惟卿功素存于社稷。位實倚于機衡。何意累章之來。欲辭大任而去。矧老而未謝。召公猶輔于康王。舊常有恩。丙吉終憂于漢帝。宜體三朝之遇。尙需萬事之咨。蓋迫大公。莫循至意。所乞宜不允。

賜曾公亮乞退第二表不允批荅

天子以安危屬大臣。宰相之進退重四海。載循匪德。肇履丕圖。每欽遇夫羣材。用茂修干庶務。矧居百辟之冠。嘗愛兩朝之遺。報功之典未隆。告老之文已至。公毋困我。宜安祖考之承。或敢侮予。終濟國家之治。維其不息。是亦有終。所乞宜不允。

賜宰臣曾公亮乞退第三表不允斷來章批荅

朕茂憲古誼。欽屬大臣。矧曰元德之老。濟予萬事之舉。方圖功以加治。忽避劇而疊陳。雖章本忱辭。然詔已確諭。朕維先王不遺故舊。所以厚民風。宰相當知經術。所以熙邦化。正期尊遇。無事過言。所乞宜不允。

賜使相曾公亮免恩命不允斷來章批荅

卿輔政三朝。勤身庶務。用式百寮。厥績茂焉。乃遠懷遺榮。數以引老。朕維卿德邵年高。不敢撓以國家之務。而顧于報功之典。猶有歉然者。曷爲拒之深也。所免宜不允。仍斷來章。

賜樞密副使呂公弼免恩命不允斷來章批荅

卿望出相閥。名昭禁塗。德蹈和而日休。材應劇而時解。洊煩于事。允輯厥庸。屬羌遐之蒙秋。正師屯之被塞。宜筦樞機之務。式圖幄席之咨。迺爾過辭。良非素好。所免宜不允。

賜樞密使呂公弼免恩命第一表不允批荅

夫導上帝之命。象在北樞。本天下之兵。謀于右府。屬沖人之初政。眷先帝之大臣。而卿勞動匪躬。忠忱一德。方倚謨明之略。宜專宥密之機。頒書在廷。勿復多避。所辭宜不允。

賜呂公弼免恩命第二表不允斷來章批荅

卿碩望表時。敏猷孚國。家承英輔之器。代有駿德之人。冠于機廷。自我定命。方仗前箸之決。遽形累牘之辭。號已渙于羣觀。理莫循于沖守。所免宜不允。

賜樞密使呂公弼免南郊恩命第一表不允批荅

朕獲執圭幣。初見郊廟。而左右之臣。罔不夙夜在事。以致力於休成。乃乙未之制。大告于廷。所以均神惠而答祀勞也。雖奉書來辭。然自天有命。顧可已乎。所免宜不允。

賜呂公弼免南郊恩命第二表不允斷來章批荅

朕卜歲習祥。因郊嚴報。肆鴻儀之就緒。擁神貺以來同。乃瞻樞衡之臣。實陪夙夜之力。維議勞之有典。奚纍牘之是陳。卽祇渙命之孚。難徇摛情之固。所辭宜不允。

賜樞密使張昇免明堂恩命第一表不允批荅

朕候秋斂之期。躬帝禋之報。夙陳物采。備講禮文。咨爾元樞。相予祠室。肇先經置。訖底丕成。拜胙均釐。告廷孚寵。遽觀上牘。有格旌勞。往協邦休。庶綏神錫。所免宜不允。

賜張昇免明堂恩命第二表不允斷來章批荅

朕躬執圭幣饗于總章而蒙帝顧格者豈曰予一人之所能今靈釐之下不敢遺四海之諸侯矧予左右大臣有夙夜在祀之助哉賞而當勞尙何拳拳之辭所免宜不允

賜參知政事張昇免恩命不允斷來章批荅

夫舜之聰明日謀治于四岳之官于是陰陽和風雨時百事以敘顧朕匪德實賴一二股肱之良用保乂我國家維爾迪哲之臣茲庸命爾圖厥政爾尙一乃心懋昭先后之訓以敷貽我無窮之聞爾乃讓厥位朕靡懌厥聞嗚呼能厥初惟其終爾其戒哉往祗乃服毋廢予之茂命所讓宜不允

賜樞密使張昇乞致仕不允批荅

卿秉德之良職在機密先帝委政遂及朕躬預定大謀厥功甚茂今羌人跳梁朕方與卿共圖廟堂之上乃數引疾爲言願上印執以歸故里豈朕所望焉其近醫藥以自扶持若乃遺榮之事朕則未聞所乞宜不允

賜張昇乞致仕不允斷來章批荅

朕惟圖廟勝者非獨謀其邦政者須舊德卿當軸畢慮據經引年乃謂履秉鈞之任則莫匪民瞻負高世之行則不爲俗累需牘三至抗懷一誠雖欲退循老氏止足之風顧不進念大雅典刑之助倘堅忠槩執

起浮辭。所乞宜不允。

賜判許州張昇免恩命不允批荅

天子慎名器之公。則朝範尊。賢者難爵祿之受。則士節勵。惟卿被先朝之重遇。輔沖人之始圖。每辭政路之榮。欲遂耆年之佚。逮命藩而加寵。復抗牘以敷懷。雖高樂退之風。難闕旌勞之拜。所免宜不允。

賜樞密副使胡宿乞退不允批荅

卿材資粹通。識宇高特。早事先帝。委樞機之萬微。見知沖人。蹈夷險之一德。方倚老成之訪。以康治定之功。刻章繼來。援禮欲去。且二帝之佐。未聞謝事之賢。而三王之朝。豈有遺年之議。雖嘉沖避。良匪通言。所乞宜不允。

賜樞密副使包拯免恩命不允斷來章批荅

夫左右近司。蓋均于執柄之路。夙夜密命。則歸乎擁樞之廷。朕常登進傑髦。稽合猷慮。以制二邊之靖。以佐萬幾之平。卿風力峻明。器懷端亮。伏諫于陛。屢形藥石之忠。秉憲于朝。一屏姦邪之氣。雖正聯于財府。終紆策于政均。爰考僉謀。遂倚大用。況天下至公之進。而君子百福之宜。奚煩露章。以格成命。宜略誠辭之挹。往同機務之寅。昭發素懷。垂永來譽。所免宜不允。

賜參知政事孫抃乞外郡不允批荅

卿識度清夷。器懷沈粹。風規表于臺閣。猷慮穆于機衡。善則歸君。勞不伐己。忽願還于陪政。迺繼上于奏函。未照委成之懷。自期冲退之佚。人言胡恤。邦寄是圖。所乞宜不允。

賜樞密副使陳升之免恩命不允斷來章批荅

夫衷政之司。體均左右之倚。本兵之府。謀繫安危之咨。惟威略爲能執天下之姦。雖盛平不可忽天下之備。適登邦傑。亶穆師僉。矧久服諫垣。屢形議論之益。比釐京邑。寔廣善聲之聞。甫參慮于機庭。已下書于綸省。再煩讓牘。深避寵途。雖嘉摛固之懷。頗鬱謨明之望。毋留渙典。往贊宥文。所乞宜不允。

賜陳升之免恩命不允斷來章批荅

國家纂四聖之緒。乘百年之安。而歲餌厭于天驕。塞氛留于氏落。眷機廷之所本。維皇武之是經。甫登臨弼之賢。實重安危之倚。奚爲露牘。欲遂還恩。宜來翼于邦圖。終收奇于廟勝。所乞宜不允。

賜樞密副使陳升之乞外郡第三表不允斷來章批荅

夫廊廟之上。與朕共籌天下事者。莫匪一二股肱之良。朕比不次用卿。固有以謀合朕意者。迺人言紛紛。使卿不得安夫厥位。至三露章。情見懇激。雖欲遠譏保名。以全易退之節。然輕用人之禮。朕不媿于茲乎。往迪乃猷。以體予之素志。所乞宜不允。

賜宰臣陳升之免恩命第二表不允斷來章批荅

朕持循治綱。攷慎相位。故謀之先定。則無他間。任之必固。則有專功。矧卿迪王佐之幾。昭勿聽之美。篤我簡照。對于弼諧。尙何需牘之陳。欲止告廷之渙。夢卜之象已屬。陰陽之應已孚。惟其肅承。是亦終賴。所免宜不允。

賜使相曹佺免恩命第一表不允批荅

朕纂大位。而推恩之及天下也。不敢遺遐外之臣。況國之親賢乎。戊辰之制。已布在廷。其勉承之。毋廢朕之新命。所乞宜不允。

賜曹佺免恩命第二表不允斷來章批荅

朕膺天地之顧。旣躬履于至尊。述祖宗之謨。用丕澤于羣位。已布大廷之命。況如外戚之賢。奚煩露章。乃欲辭寵。往收難進之慮。期體至公之衡。所免宜不允。

賜參知政事趙概免恩命不允斷來章批荅

卿清規表競。厚望鎮浮。溫藻豐于帝謨。嘉猷經于國論。比貳機廷之畫。適更政席之咨。德罔聞而弗休。務有應而皆裕。何興言于固避。殊抑美于僉謀。往復乃司。尙副予倚。所免宜不允。

賜參知政事趙概乞退不允批荅

夫君欲求治也。尊賢然後興。士欲伸道也。趨時若弗及。卿躬賢人之蘊。履輔臣之榮。足以經太平于當時。

圖永譽于乃後。而繼陳函奏。願解政幾。且年未合經。不得謂之知止。病而謝事。不得謂之徇公。勉輔至和。遲親嘉訪。所乞宜不允。

賜同僉書樞密院事郭達免恩命不允斷來章批荅

卿早司軍要。實捍邊衝。識行師之先謀。負許國之孤節。嘗言秉樞之地。舊用經武之臣。方歷選以命材。何過陳而避寵。往裨宥畫。益志忠圖。所免宜不允。仍斷來章。

賜樞密副使王疇免恩命不允斷來章批荅

夫天之樞極。上司化元。國之機廷。右幹武事。適延登于峻德。以參決于宥謀。笑煩露章。乃欲避寵。且天子之枋。惟厲爵祿之公。況賢者之升。安待歲月之次。已頒之命。宜俛而承。所免宜不允。

賜吳奎免恩命不允斷來章批荅

朕肇親邦務。尊用弼臣。矧曰舊人之良。實爲先帝所睹。向居喪制。不可奪情。茲復政常。猶且避寵。宜往收于冲慮。期終濟于丕成。所免宜不允。

賜安武軍節度使郝質免恩命不允批荅

朕賴天之靈。獲主宗廟。踐阼之始。大賚庶方。時維虎臣。提甲巖下。豈不夙夜。亶有厥勞。告廷之書。已泱羣聽。露章辭寵。難徇所陳。所免宜不允。

賜郝質免恩命不允批荅

國家提萬兵之勁。萃之畿中。謀元帥之良。護于巖下。矧卿嘗從征伐之事。加有宿衛之勤。宜授鉞于師壇。總環宮之夜柝。蓋旌勞者必異其寵。御衆者必予之權。毋爲過兢。其服重委。所免宜不允。

賜殿前副都指揮使武康軍節度使李璋免恩命不允批荅

國家仰撫乾緯。茂建師牙。提天下之選才。宿殿中之密衛。適圖邦峻之望。已穆朝僉之謀。迺需牘之上聞。以盛權而力避。矧專閫制者。重安危之寄。總禁卒者。嚴夙夜之思。政不可以虛材。謙豈足以應劇。難稽邦渙。往治戎昭。所免宜不允。

賜知許州李璋免恩命不允批荅

卿出于外家。襲組高閭。擢自先帝。統師嚴除。忽陳宿衛之勞。乃冀便安之地。宜齋場之換節。俾輔郡之膺符。旣敷寵綽之衣。遽有攜章之上。姑循素請。毋或重辭。所免宜不允。

賜知相州李端愿免恩命不允斷來章批荅

卿出重闈之緒。承外館之華。有溫故之學。而不流世腴。有邁倫之資。而自躋賢表。俾建師牙之盛。且旌戚苑之英。乃抗志以露章。欲辭榮而就第。夫峻傑者人之所望。名器者朕安敢私。往肩忠圖。宜略攜節。所免宜不允。

賜樞密使程戡乞致仕不允批荅

朕惟古輔拂之臣。雖年耆德尊。或在位者。豈薄于風節。而憚于聲利哉。誠愛君澤民。信已行道。惟恐其不至也。卿忠實忱明。邦之環望。秉事二府。夙夜乃心。何引年上絳。欲循止足之分。甚非所以副朕倚老成之意。其務專精神。止念慮。毋需章以陳。以拂于予聞。所乞宜不允。

華陽集卷二十三

內制

皇伯東平郡王允弼免恩命第一表不允口宣

朕履初陽之吉。躬大禘之虔。肆均神策之休。已下宗藩之制。雖需函之亟上。諒渙檢之難留。

皇伯允弼免恩命第二表不允斷來章口宣

卿承天支之華。率公族之厚。適相承于熙事。宜均錫于靈釐。過達摛章。豈符公聽。

皇長子頊免恩命第一表不允口宣

朕承休聖統。建嫡名封。推學序之夙勤。嘉寢門之屢問。需章忽蒞。制檢尙留。宜略過沖。庸綏公望。

皇長子頊免恩命第二表不允斷來章口宣

東學旌賢。右藩析寄。爰覽屢辭之牘。尙稽已渙之文。僉以素同。往其卽受。

皇長子進封潁王頊免恩命第二表不允斷來章口宣

朕承天茂序。建于大邦。庶從師傅之聞。且廣本支之輔。雖仍上牘。宜視批章。

皇子進封東陽郡王頊免恩命第一表不允口宣

朕嘉進嗣賢。析封邦爵。爰述先王之訓。肆揚列辟之聞。宜卽欽承。毋或固避。

皇伯祖威德軍節度使承亮。改封秦國公。免恩命第一表不允口宣。

朕稽求暨文。崇建近屬。已布治朝之聽。有光奕世之承。宜卽欽膺。毋煩沖避。

皇伯祖承亮。免恩命第二表不允。斷來章口宣。

卿地尊皇屬。望列英藩。適更大國之封。益啟舊邦之宇。往祇渥命。卽斷撝章。

皇伯宗諤。免恩命第一表不允口宣。

朕孝治四方。恩先九族。睦戚藩之近屬。還宰鉉之榮章。毋執過沖。卽宜欽受。

親王使相節度使。免恩命第一表不允口宣。

卿近屬之賢。先朝所禮。肆纂丕極。盍推茂恩。宜卽欽承。用副崇獎。

親王使相節度使。免恩命第二表不允。斷來章口宣。

朕卽紹丕圖。首褒近屬。雖遜函之渚至。顧渙命之難還。毋或過辭。以稽羣聽。

樞密使文彥博。免南郊恩命第一表不允口宣。

朕祗被鉅儀。涓成元祀。乃眷政均之倚。適推神惠之休。宜卽欽承。毋煩多遜。

文彥博。免南郊恩命第二表不允。斷來章口宣。

卿躬咸德之良。筦元樞之務。肆涓成于邦祀。宜茂錫于神休。毋復過陳。其往欽受。

樞密使富弼免恩命第一表不允口宣

卿舊秉國鈞。勞精靡顧。奄遭家難。執禮莫回。適終喪期。且冠樞省。才猶屈用。義可去辭。

判河陽富弼免恩命第一表不允口宣

卿當世夙望。先帝大臣。累辭持柄之勞。甫遂便藩之佚。將相之紱。不曰寵乎。

富弼免恩命第二表不允斷來章口宣

卿自擢疾告。屢避政幾。進膺台鉞之崇。往奉藩封之寄。始循來請。宜斷謙封。

樞密使張昇免明堂恩命第一表不允口宣

卿筦司機務。勵翼謨明。顯相精禋。熙成闕典。蒙天錫祉。獨旦敷猷。忽達謙函。匪昭公聽。

張昇免南郊恩命第二表不允斷來章口宣

朕格帝元饗。浹民太和。矧股肱之倚謀。實夙夜之相祀。適孚靈施。游達摛章。雖懷難進之高。蓋有莫還之渙。

樞密副使孫抃免恩命不允斷來章口宣

卿學茂才粹。身端行方。流譽禁游。贊微宥命。方倚將明之略。且旌冲靖之風。謙豈于煩。寵宜卽受。

參知政事孫抃。免恩命。不允。斷來章。口宣。

卿文潤鴻猷。機參宥命。倚重老成之望。更陪政本之司。邦寵已行。朝僉靡間。毋庸再讓。往承厥休。

樞密使呂公弼。免南郊恩命。第一表。不允。口宣。

朕肇禋吉土。先薦太宮。既逸三神之釐。遂孚四海之澤。矧吾近輔。可緩褒章。

呂公弼。免南郊恩命。第二表。不允。斷來章。口宣。

饗均神釐。丕發邦號。首推近輔之寵。抑有累聖之規。毋執勞謙。以稽成命。

宰臣韓琦。免明堂恩命。第一表。不允。口宣。

卿總秉化元。亮成孝饗。肆敷廷渙之寵。蓋本帝臨之休。宜略謙懷。庶欽靈施。

韓琦。免明堂恩命。第二表。不允。斷來章。口宣。

卿應符翼化。秉德相祠。輯大饗之蕃休。荅丕勞于茂獎。毋煩沖避。其往肅承。

韓琦。免南郊恩命。第一表。不允。口宣。

朕承天之序。旅帝于郊。欽惟元德之臣。首被靈孚之澤。其往欽荷。毋爲重辭。

韓琦。免南郊恩命。第二表。不允。斷來章。口宣。

朕承天元之辰。躬郊類之事。大格靈歆之貺。首均邦宰之榮。其宜肅承。毋或固避。

韓琦免恩命表不允口宣

卿丕有賢業。贊于聖圖。平號之辰。錄勳爲冠。卽膺顯數。姑略冲懷。

樞密使曾公亮免恩命表不允口宣

卿進繇儒術。望重師瞻。特陞冠于樞聯。方圖綏于廟略。宜祇茂命。難徇冲懷。

宰臣曾公亮免南郊恩命第一表不允口宣

朕內心盡慎。外方致彊。及此嘉成。罔不蒙澤。承神之惠。毋或固辭。

曾公亮免南郊恩命第二表不允斷來章口宣

朕躬詞泰壇。天下蒙祉。睠于上宰。寵不可稽。宜庸而承。以渙神惠。

檢校太尉兼侍中曹佾免恩命第一表不允口宣

朕纂祖之休。型民以孝。方隆慈壽之養。益獎舅家之賢。雖覽摛函。難停寵綍。

曹佾免恩命第二表不允斷來章口宣

朕愛篤慈闈。恩加戚苑。再覽需章之避。難留渙汗之華。當體倦勤。卽宜祇受。

判鄆州曹佾免恩命第一表不允口宣

卿襲慶勳門。參華徽府。願臨藩而宣績。俾換節以旌勤。成命之行。固宜欽受。

殿前副指揮使郝質免恩命第一表不允口宣

卿忠勁之臣。職在宿衛。肆予纂服。宜有厥勞。頒綬在廷。所宜欽受。

郝質免恩命第二表不允斷來章口宣

卿茂建師旄。肅提禁卒。屬朕纂承之始。嘉乃宿衛之勞。若時寵褒。毋或固避。

使相宋庠免恩命不允斷來章口宣

卿夙懷賢業。洊秉邦鈞。覽避寵之疊封。遂均勞于陪甸。往祇明命。奚假固辭。

樞密副使王疇免恩命不允斷來章口宣

國家茂登峻傑。參翼機衡。方仰輯于邇謀。何需陳于避牘。宜膺寵荅。以勉欽承。

同簽書樞密院事郭遼免恩命不允斷來章口宣

國家制必稽先。治不忘武。晷輯勤于邊瑣。特進貳于神機。奚煩擢章。以格定命。

參知政事趙槩免恩命不允斷來章口宣

卿雅負瓊名。茂躋顯序。適贊機廷之畫。更陪宰路之熙。矧政席之虛賢。已寵書之下綬。奚煩曲謹。以闕羣瞻。

判延州程戡免恩命第一表不允口宣

卿志懷閔達。德業粹明。方均右府之勞。忽起西垂之顧。進班徽省。示寵鈞廷。宜俯以承。勿勤于讓。

知相州李端愿免恩命第一表不允口宣

卿大主之子。太宗之孫。不領將旄之榮。何敦戚苑之愛。往祇成命。式獎素勤。

召翰林學士司馬光入院口宣

卿才思穎華。風規端劭。久侍露門之講。兼紬廣內之書。器業足以輔皇猷。文章足以潤天藻。宜與禁除之。召益光賢蘊之修。

召翰林學士范鎮再入院口宣

卿夙負讓名。自躋顯序。偶緣書詔之累。稍去禁嚴之遊。靡還回之介衷。乃樂易而迪德。還敷皇藻。益懋賢猷。

召翰林學士賈黯入院口宣

卿馳望士林。預班禁從。比稍違于常豫。且聽守于便符。未銜會稽之章。已虛宣室之席。當還儀于內署。庶增繹于皇猷。往服嘉恩。勉經素業。

召翰林學士馮京入院口宣

卿力學有原。秉心不屈。早視北門之草。比更大鹵之符。適峻列于中司。宜寵還于舊物。更從嚴召。以獎英

游。

召翰林學士王疇入院口宣

卿氣節莊厚材謀粹明自執憲以端朝每傳經而論事方思前席之間宜預北門之遊其勉素懷以申美業。

召翰林學士楊繪入院口宣

卿秉心不流處義弗撓美才足以端國器鴻藻足以潤帝謨屬因藉以去朝甫卽吉以還序且奉北門之訪更華二禁之遊方遲英謀特從嚴召。

召樞密副使吳奎起復口宣

卿執喪去位茹痛踰情屬予求治之初正驚急賢之想宜循權制用體睦私。

召樞密使文彥博赴闕口宣

國家茂經正本慎倚柄臣適圖邦傑之良進筦神樞之府宜膺迅召且竚來儀。

召樞密使富弼赴闕口宣

卿早事先帝時爲宗臣罹憂去朝終制復位宜趨召節以炳台符。

召起復宰臣富弼赴闕口宣

卿德冠朝倫。功熙天載。屬內艱之去位。終上鉉之虛司。雖嚴詔驛之馳。猶固喪廬之慕。勉思大義。垂應羣瞻。

召判相州韓琦赴闕朝見口宣

卿罷制邊衝。還膺使寄。顧秋炎之未解。馳闕路以多勤。特戒使輅。以頒召檢。

召武康軍節度使李端愿赴闕口宣

朕總維羣艾。振輯丕機。有懷肺腑之良。尙滯藩符之守。方圖親倚。宜卽召還。

撫問判大名府文彥博口宣

卿望冠台躔。寵司留鑰。矧北門之地重。方廣莫之風高。馳心王室之勤。經慮邊藩之遠。特申存撫。用篤瞻懷。

又

卿材隆棟石。德茂鈞衡。候臨春物之闌。地重留都之寄。馳輅將命。仄席申懷。

撫問判河南府文彥博口宣

卿舊德之良。久去廊廟。往釐西宅。忽又歲闌。經務留神。固亦勤止。

撫問判河南府文彥博爲母亡口宣

卿任重政塗。寄深留鑰。忽遘茹荼之苦。實均同體之情。勉抑至哀。少紓沖念。

撫問判相州韓琦兼賜湯藥口宣

卿內辭宰司。出撫鄉郡。適及歲陰之暮。固多政事之勤。特斥撫循。以申眷遇。

撫問判大名府韓琦兼賜詔書湯藥口宣

卿出擁使旄。就更留鑰。屬暑威之方熾。顧藩事之多勤。緬念忠勞。特申曉撫。

撫問判大名府韓琦口宣

維中原之吭。在大河之北。勞上台之夙望。守一道之重符。適履隆寒。無虧沖守。

撫問知青州歐陽脩口宣

卿早以時材。預聞大政。申念徙藩之勤。載深仄席之思。特示撫存。用昭眷矜。

撫問知北京王拱辰口宣

卿輟禁褰之嚴。膺留都之寄。適及凝嚴之序。有懷鎮撫之勞。宜諭詔音。且隆賢遇。

撫問知延州孫沔口宣

卿向被朝僉。出膺邊寄。顧封疆之勞慮。因霧露而爽和。適及春餘。勉綏德履。

撫問觀文殿學士判太原府呂公弼口宣

卿輟于機務。殿彼方隅。載惟疆事之勤。無爽時休之輔。特將勞問。庸示顧懷。

撫問陝西宜撫使韓絳判官呂大防等兼賜湯藥口宣

羌種跳梁。邊萌騷繹。念使車之夙駕。犯塞路之苦寒。宜有寵頒。以資冲衛。

撫問韓絳等兼賜湯藥口宣

羌人背約。王旅多屯。有煩使指之行。適冒祁寒之候。宜蕃珍錫。以導至和。

撫問韓絳等禦寒衣服口宣

敵視未夷。王師在外。惟風霜之所薄。固夙夜之多勤。特致恩頒。更爲寒禦。

撫問修山陵所殿前副指揮使郝質以下兼賜湯藥口宣

嘉原應卜。將戒遠期。衆役獻工。實繁素畫。爰將殊禮。以勞至勤。

元日大慶殿行禮宜勞執儀仗將士口宣

朕班麻春元。肆朝邦瑞。迎萬祥于殿旦。陳盛禮于大廷。申懷列衛之勞。猶冒餘寒之氣。有嘉忠謹。特示眷存。將士等各好在否。

冬至大慶殿行禮宜勞執儀仗將士口宣

朕祇適先猷。肇修冬會。眷惟宿衛之士。良冒風霜之勤。及此禮成。宜膺撫詔。將士等各好在否。

撫問河北路臣寮兼賜夏藥口宣

大河之北爲國襟喉。被寄之臣。勞于經事。赤煒臨候。氣以鬱煩。良劑所頒。益將恩撫。

撫問涇原秦鳳兩路邊臣兼賜夏藥口宣

卿等早以器能。膺予西寄。輯戎備塞。時乃之勞。炎曦御辰。人或被暍。特頒靈劑。以輔遵調。

撫問鄜延環慶路邊臣兼賜夏藥口宣

卿等夙被朝綸。游分邊委。屬炎威之霽盛。顧疆事之多勤。宜有寵頒。用資沖輔。

撫問河東路邊臣兼賜夏藥口宣

卿等外扞邊衝。威申信著。時惟炎瘴。臨事固勞。頒藥上益。用優眷遇。

撫問四路官吏諸軍將校口宣

卿等早被寵綸。並宣忠幹。維是簡書之畏。豈無夙夜之勞。適戒使行。聊申詔撫。

撫問河北西路沿邊臣寮口宣

大野之衝。金城相距。維是封疆之守。豈無夙暮之勞。時及軫思。特將瞻撫。

安撫河北災傷州軍官吏口宣

卿等方秋御辰。淫雨爲沴。申念在公之恪。固多經事之勤。特命撫存。以申顧想。

撫問廊延環慶路沿邊臣寮口宣

卿等遠臨邊守。具飭兵防。載惟夙夜之勤。適在風霜之序。有嘉忠瘁。特示撫存。

又

卿等被寄乘邊。豐威折敵。方祁寒之在候。維疆事之多勤。歛起寤思。用將詔撫。

撫問麟府路沿邊臣寮口宣

卿等奉將朝寄。分護塞防。屬涉夏之初炎。念從公之匪懈。特申撫諭。庸示眷私。

撫問保州路臣寮口宣

卿等保塞之衝。列城有守。念夙經于疆事。方重飭于秋防。特示撫存。用申眷想。

撫問梓州路臣寮口宣

卿等奉寄于朝。飭躬在事。顧山河之載邈。念夙夜之多勤。特示眷懷。以申撫諭。

撫問兩浙并淮南路官吏諸軍將校口宣

卿等被寄于朝。營職在外。歲離水患。宵軫邦憂。遣使按行。加民存遇。眷爾勤事。申予撫恩。

撫問廣西西路桂邕州轉運提刑知州兵官將校等口宣

卿等奉寄于朝。守封于外。秋炎未解。嶺道殊賒。言念忠勤。式將恩撫。

華陽集卷二十四

內制

賜皇兄北海郡王允弼生日禮物口宣

卿德憑天系名固宗藩載更淑律之期游紀祥弧之旦維鼓鐘之在肆維器幣之在庭以侑燕私以綏壽嘏。

賜皇伯東平郡王允弼生日禮物口宣

和生春琯德懋宗藩紀慶誕之初期有寵頒之舊式庶膺賢祉以大皇支。

賜皇叔華原郡王允良生日禮物口宣

朕廣邦族之仁倚戚藩之輔顧維冬之杪候屬載誕之初辰申命寵頒助迎休祉。

賜皇叔襄陽郡王允良生日禮物口宣

卿天支擢秀宗屏流徽屬震夙之令辰寵分頒之茂式克綏壽祉庸示眷私。

賜皇長子淮陽郡王頊生日禮物口宣

卿慶發仙源賢鍾上嗣當炎明之正序紀震夙之休符厥有賜常用均時祉。

賜皇長子穎王頊生日禮物口宣

卿德懋皇支。休推上嗣。屬恢台之肇候。紀震夙之嘉辰。式將列籩之頒。用續垂弧之慶。勤宣物望。永對邦休。

賜皇子鄴國公頊生日禮物口宣

卿慶發天支。寵疏公社。甫就寄觚之學。載逢吉夢之期。近飲菊之佳辰。有承筐之賜式。勉躬令聞。念服殊休。

賜皇伯號國公宗諤生日禮物口宣

卿望重宗藩。榮聯宰鉉。屬恢台之首序。紀誕育之多祥。式示寵頒。用申禮遇。

賜皇伯使相宗樸生日禮物口宣

月旅嘉平。日臨上浹。載紀生于英威。實表德于皇支。爰致恩頒。用迎壽祉。

賜皇弟岐王頊生日禮物口宣

卿榮疏王爵。愛篤天倫。屬慶誕之佳辰。有寵頒之素式。特馳近侍。往喻隆私。

又

卿望重英藩。愛深皇戚。紀誕期于良序。推寵錫之舊彝。其助家祥。且旌賢履。

賜樞密使文彥博生日禮物口宣

寒生玉瑄。望冠星樞。紀慶誕之初期。有寵頒之舊式。庶蕃賢祉。以懋邦基。

賜判河南府文彥博生日禮物口宣

卿象煜台躔。功流鼎路。屬設弧之令旦。方主鑰于留都。特將恩篚之頒。俾侑私庭之慶。茲爲異數。以寵輔臣。

賜判運州曹偁生日禮物口宣

卿溶領藩符。比持台鉞。屬炎煒之杪候。紀誕慶之初辰。俾續遐齡。式將優禮。

賜使相曹偁生日禮物口宣

卿德炳台符。望華咸苑。紀誕祥于嘉月。推賜式于上臺。以續茂齡。以昭異數。

又

卿緒出勳門。位聯台路。屬炎蒸之在候。紀震夙之當辰。爰致寵頒。用昌靈壽。

賜判北京賈昌朝生日禮物口宣

氣凝霜籥。任總邊符。載臨六射之辰。特致上臺之錫。俾續壽祉。且昭眷懷。

又

金行之肅。爰及素辰。邦運之隆。是生碩輔。載中階之舊德。倚北道之全謀。將修厥祥。用蕃爾錫。

賜使相宋庠生日禮物口宣

春籥襲和。嶽符涵粹。來翼皇圖之懋。載臨誕景之祥。飭名閥之嗣賢。馳上臺之賜式。旣資燕喜。又輔恩華。

又

卿入司台鉉。出擁帥旄。乘在木之煦辰。紀維熊之嘉兆。素厚弼臣之禮。載將御府之頒。俾爾熾昌。應予欽矚。

賜宰臣韓琦生日禮物口宣

卿知覺民生。功擬天化。秉肇秋之肅氣。紀載誕之嘉辰。矧逢日月之熙。方極君臣之遇。命芝蘭之家彥。致牽醴之朝頒。洽爾燕虞。體予延矚。

又

卿任冠台衡。誕逢商序。錫元精于嶽極。體正氣于五行。發爲休功。翼我昌會。推名門之峻嗣。將御府之華頒。助天百祥。均國永祚。

又

歲在涒灘。律中夷則。鍾四方之正氣。稟上相之元符。計成七廟之安。勳列百僚之冠。載臨誕序。式舉賜儀。

又

嶽極于天。默下神靈之氣。帝賁之弼。亶如物色之求。屬秋孟之嘉辰。紀山陽之吉夢。申命趨庭之駿。爰將賜籩之儀。庶續茂年。永扶休運。

又

朕攬收羣豪。尊遇二府。矧予元德之宰。厥有大勳之昭。屬素律之氣清。載高門之誕慶。有幣盈籩。有馬乘閑。並將君錫之蕃。以助天祥之侈。

又

顯氣迎商。舒靈度朔。間生名世之傑。休有格天之庸。命嗣儔于祕局。出賜常于內府。並爲殊寵。以助嘉祥。賜宰臣曾公亮生日禮物口宣

又

卿毓德粹文。選辰華吉。槐庭論道。茂翼化元。星鳥占春。環臨誕序。爰將蕃錫。庶續遐齡。

時維仲春。日在營室。紀天和之茂節。生邦輔之粹臣。定大冊于皇圖。炳休功于史載。爰將嘉錫。益助多祥。賜皇兄保靖軍節度使宗諤告敕口宣

朕圖衛京師。進強藩屏。矧宗英之載譽。宜宸渙之頒文。其體寵甄。毋忘被服。

賜皇子進封淮陽郡王頊告敕口宣

卿席皇家之慶。居上嗣之賢。建右輔之名。封頒大廷之渙號。僉言惟允。茂敷其膺。

賜皇子官告口宣

朕崇建宗藩。夾輔王室。自寵綸之誕布。已謙牘之屢陳。宜卽嘉辰。往服休命。

賜皇伯虢國公宗諤告敕口宣

卿出于皇緒。列彼近藩。適還上鉉之崇。已告大廷之衆。所宜欽受。以體寵懷。

賜皇弟樂安郡王顥告敕口宣

朕肇纂丕圖。徧澤羣位。申言同氣之愛。難徇終喪之情。王爵帥牙。勉其祇受。

賜判鄭州宋庠告敕口宣

卿厚望端朝。粹文華國。懇避樞位之寵。褒升台鉞之崇。往莅陪藩。宜祇顯綽。

賜判河陽富弼告敕口宣

卿久服大位。勤宣令猷。自初違裕之來。積有避榮之請。已申誕告。宜卽欽承。

賜參知政事歐陽脩南郊加恩告敕口宣

朕奉玉幣之精。躬帝親之享。大格靈孚之貺。首均邦輔之榮。其宜肅承。以應顯陟。

賜武康軍節度使李端愿告敕口宣

卿望華威苑。機洞戎輶。宜錫鉞于齋場。更剖符于朔鎮。往欽茂命。益勵壯猷。

賜武城軍節度使知許州李璋告敕口宣

卿入提禁旅。顧積厥勳。出領藩符。庶均其秩。載蕃之寵。毋替而忠。

賜淮康軍節度使知曹州張茂實加恩告敕口宣

比者練吉商辰。報成世室。既洽神釐之茂。有懷邦翰之長。使茂馳華。詔函賚寵。往祇厥服。益勵迺猷。

賜宰臣韓琦南郊加恩告敕口宣

朕習卜歲祥。肇興時祀。丕布休成之澤。首推顯相之勞。宜體靈歆。卽祇渙命。

又

卿肅裨大猷。總相元祀。裁饌適于鉅典。竣事擁于蕃釐。肆爲龍光。首褰衡弼。自天有命。與國承休。

賜樞密使曾公亮告敕口宣

卿蘊造微之識。資經遠之才。久陪論于鼎司。宜冠聯于樞省。告廷之命。當肅以承。

賜宰臣曾公亮南郊加恩告敕口宣

朕肇禋吉土。還御端闈。肅成止饌。大渙嘉澤。宜先列辟。以寵元功。

賜樞密使呂公弼加恩告敕口宣

朕承天正之序。修郊見之儀。竣祠熙明。介福穰簡。爰推惠澤。以寵輔臣。

賜宣徽南院使判延州程戡告敕口宣

卿早毗政路。出奉藩符。載圖邊鎮之勞。宜寵齋壇之拜。往膺異數。更輯前勳。

賜步軍都虞候趙滋告敕口宣

卿夙明軍志。外憺王威。進提虎旅之嚴。環總星藩之衛。往祇茂獎。毋墜素勞。

賜殿前副都指揮安德軍節度使郝質告敕口宣

國家茂建帥權。肅提禁旅。統以周廬之衛。賜之茂勳之行。維命是承。匪忠不報。

賜判許州賈昌朝敕牒口宣

卿舊冠台衡。久司留籥。間閱露章之請。願從易鎮之行。姑徇所懷。往綏予寄。

賜判大名府賈昌朝告敕口宣

卿象煜星階。寄隆邦翰。適更符于外闕。亟宣綍于明廷。欽師訓辭。進圖終烈。

賜賈昌朝加恩告敕口宣

朕明發孝思。涓成嘉享。蕃被靈釐之錫。茂思舊政之均。揆旦頒文。飭車將命。益綏邦倚。趣拜王休。

賜樞密使張昇明堂加恩告敕口宣

卿秉一德之良。當萬幾之軸。會講文于大事。常領使于先期。比輯鉅儀。盍膺靈施。

賜判許州張昇南郊加恩告敕詔書口宣

神時告虔。帥垣在寄。敘奉祠之多祉。嘉述職之素勤。申錫寵章。往欽靈施。

賜觀文殿學士知河南府張方平告敕口宣

卿甫畢親喪。合還朝位。既進班于祕殿。且均寄于留都。宜體予懷。往祇乃命。

賜資政殿學士知河中府孫沔告敕口宣

朕甫親萬幾。適瞻舊德。雖高謝事之舉。猶仰濟時之謀。往服寵書。起班顯序。

賜判河南府文彥博制敕并赴闕書口宣

卿先朝老成。當世才望。特申渙命。起莅西都。宜卽欽承。用體眷賴。

賜判延州郭達官告敕牒兼傳宣撫問口宣

卿輟自內樞。久臨邊瑣。適就更于大鎮。終倚輯于一方。尙體沖私。卽祇嘉命。

賜知定州王拱辰告敕并賜對衣金腰帶牽轡馬等口宣

洪河之北。素極襟喉。詞禁之中。舊高頗牧。兼學士之三組。徙版曹之左卿。就錫寵書。往祇優寄。

賜知青州唐詢告敕并賜對衣金腰帶靈轡馬等口宣

卿迪德粹明。秉懷高介。贊大謨于西掖。更美政于三州。每深宣室之思。固有周南之滯。宜進聯于經幄。尙留愛于明禱。特推御府之頒。仍飭使驂之遽。旣優之命。不顯其承。

賜知慶州韓絳告敕對衣金腰帶鞍轡馬錢三百貫文口宣

卿本粹夷之德。蹈孤峻之風。惜去職于禁游。遂分符于藩守。申念論思之舊。還儀侍從之聯。飭使驛之兼馳。致上臺之蕃錫。往更邊寄。祇服朝休。

賜天章閣待制知渭州蔡挺告敕銀器衣著并傳宣撫問口宣

卿適被朝綸。再膺邊寄。特戒綸函之錫。仍加篚幣之將。宜體寵懷。亟卽欽受。

賜判大名府賈昌朝朝見到闕都城門外排御筵酒果口宣

卿易藩北道。錫對西清。載惟行旆之勤。適冒炎曦之熾。已申郊勞。更洽宸頒。

賜使相韓琦赴闕生料口宣

卿擁節還朝。騰裝遵陸。適及郊關之次。有懷徒御之勞。聊示寵頒。用將禮遇。

賜使相曹佺赴闕生料口宣

卿抗旌啓行。握節應召。甫及近郊之次。豈無夙駕之勞。何以將之。惟牽及餼。

賜鄭延路副都總管賈遠赴闕生料口宣

卿勞師被塞。式遏外虞。擁節環宮。有嚴中衛。稅裝之始。頒餼惟豐。

賜知潞州向傳範赴闕生料口宣

卿比易要藩。適趨召節。方屬炎蒸之序。固多跋履之勤。芻粟餼牢。用將渥惠。

賜判河南府文彥博赴闕生料口宣

卿枕塊終喪。追錄應召。適及郊圻之次。用將牢餼之頒。眷惟舊臣。式是優禮。

賜樞密使富弼赴闕生料口宣

卿喪廬終服。靡奪至情。宥府冠謀。益旌宿望。遘國哀之未幾。聞君召之載馳。適稅塗裝。爰頒禮餼。

賜樞密使文彥博茶藥口宣

卿寵在邦國。出擁師旄。屬秋暑之尙煩。涉關程之良勩。爰推薄賜。式用珍調。

賜判相州韓琦茶藥口宣

卿適趨召節。甫次近郊。載惟跋履之勤。宜舉匪頒之式。用資沖奮。以示寵懷。

賜判延州郭遵茶藥口宣

卿夙戒使車。來趨召節。屬凝寒之在候。顧遠涉之爲勞。特有匪頒。以資保御。

賜知潞州向傳範茶藥口宣

卿比徙東藩。甫臨近甸。屬炎威之煩熾。顧驛路之逶遲。宜有寵頒。用資和膏。

賜判許州賈昌朝茶藥口宣

卿爰趨召節。甫次神圻。維大旆之遵塗。屬晚冬之屆候。宜推珍錫。用輔沖綏。

賜樞密副使以下罷散乾元節道酒果口宣

卿等祇率朝裾。預臨梵苑。收妙緣于實供。來善祝以鴻禧。宜示寵頒。以資歡集。

賜樞密使張昇爲仁宗皇帝上僊遺衣物口宣

卿舊政之臣。請藩于外。重開邦輔。慨慕想深。茲有遺頒。宜欽而受。

賜宰臣禮儀使曾公亮往西京奉安仁宗英宗御容都城門外酒果口宣

卿肅奉真儀。往安梵宇。方屬炎歊之候。靡勝護從之勞。宜有頒宣。用申眷待。

賜宰臣禮儀使曾公亮以下往西京奉安仁宗英宗御容迴茶藥口宣

卿等出擁使車。往安真像。甫終盛禮。將戒近圻。宜有頒宣。用申眷待。

賜諸州路知州以下衣襖口宣

歲律迎寒。方隅勤事。命使輶之夙駕。將恩服之時頒。申念爾勞。具祇優睦。

雄州撫問契丹皇帝賀乾元節人使口宣

卿等使軺聯御聘玉修歡載勤征陸之長適戒候亭之始爰將詔撫以厚賓儀

恩州賜契丹皇帝賀乾元節人使茶藥口宣

卿等游修歡聘祇侑誕儀涉春物之寢華馳使駢而增耀特推珍錫用示厚懷

恩州賜契丹皇太后賀乾元節人使茶藥口宣

卿等將睦鄰音申延誕慶爰履載陽之候有勤于隰之行特命分頒以申存矚

都亭驛賜契丹皇帝賀乾元節人使內中酒果口宣

卿等奉好寶鄰薦祥誕會申念使華之勤游推邦錫之殊嘉果芳醪頒于御所

又

卿等展幣鄰封稱觴壽誕留使裝于館下出珍錫于禁中雖曰常儀本于厚好

都亭驛賜契丹皇帝賀乾元節人使銀鈔鑼等口宣

卿等信達鄰音慶祇誕會眷馳軺之遠暨屬授館之初寧賜厚邦儀情孚世好

恩州賜契丹皇帝賀正旦人使茶藥口宣

卿等夙將信檢祇自寶鄰並驚使軒適留郡堞宜將邦錫以浣途勳

又

卿等信函將命。行越半途。靈劑均和。頒由中禁。有嘉勤節。庸示厚儀。

恩州賜契丹兩番賀正旦人使茶藥口宣

卿等春和襲篋。鄰聘飛臚。涉長陸以載勤。冒寒威而良苦。俾將珍錫。庸示厚儀。

又

卿等並持使節。遠歷塞途。懋將鄰好之和。躬展歲元之慶。特申嘉賜。以獎至勤。

恩州賜契丹皇太后賀正旦人使茶藥口宣

歲籥將新。鄰音載睦。適及半途之候。正衝殘臘之寒。素厚賓儀。首推賜式。

班荆館賜契丹皇帝賀正旦人使到闕酒果口宣

鄰寶通歡。使華將命。適及候亭之次。聊申燕席之儀。爰有常頒。以申厚遇。

都亭驛賜契丹皇帝賀正旦人使酒果口宣

華車昭隲。馳自寶鄰。嘉賓薦觴。班從紫禁。恩凝上館。慶集端辰。

都亭驛賜契丹皇帝賀正旦人使春旛勝等口宣

卿等奉儀鄰聘。弭節賓亭。驚歲律之游更。慶春華之滋始。宜膺邦賜。以導時休。

都亭驛賜契丹皇帝賀正旦人使生餽口宣

春華叢朔鄰聘修儀就寧館舍之初申厚餼牽之錫式將殊遇庸獎至勤

都亭驛賜契丹皇帝賀正旦人使朝辭酒果口宣

卿等遠持邦問舉穆賓華遽申重陞之達將戒歸途之御至勤可尙嘉賜是將

都亭驛賜契丹皇帝祭奠人使銀鈔鑼等口宣

卿等夙戒使驂冒征炎陸馳赴鄰哀之遽就寧賓驛之初申念途勤爰將賜式

都亭驛賜契丹皇帝弔慰人使銀鈔鑼等口宣

卿等敦和世好展慰鄰憂屬秋暑之未闌涉塞途之已渺適寧征御爰舉賜常

恩州賜契丹兩番賀登寶位人使茶藥口宣

卿等受言于國將命在塗爰趣飛軒甫經近堞特推邦錫以寵使華

班荆館賜契丹皇帝賀登寶位人使到闕酒果口宣

皇圖纂慶賓組來儀均玉華之芳醪副金盤之嘉實爰將渥惠聊浣遐征

都亭驛賜契丹皇帝賀登寶位人使射弓例物口宣

朕茂纂聖圖夙來鄰聘惟使軺之遠駕有賓射之舊儀難阻勝遊聊申蕃錫

都亭驛賜契丹皇帝賀登寶位人使朝辭酒果口宣

卿等握節來朝。始云終事。飛輿上道。歛及歸期。嘉果芳醪。更頒離席。

雄州撫問契丹兩番賀壽聖節人使口宣

春和動籥。鄰睦飛函。夙馳使範之華。方會誕辰之慶。有嘉勤節。用示撫言。

都亭驛賜大遼皇帝賀正旦壽聖節人使宴花酒果口宣

歲更芳律。邦集善祥。眷奉聘之有儀。已經筵之在館。御醪宮藥。並寵賓筵。

班荆館賜大遼皇帝弔慰人使酒果口宣

卿等夙戒使駢。冒征炎陸。馳赴鄰哀之遽。暫寧候舍之初。申念素勤。爰推嘉錫。

雄州撫問大遼皇帝賀正旦人使口宣

卿等甫屆歲元。浚修鄰聘。緬念遵塗之永。適當陟境之初。特示撫存。用昭瞻遇。

恩州賜大遼皇帝賀正旦人使茶藥口宣

卿等具飭使華。浚修邦慶。屬歲陰之逾盡。涉關路之悠長。特有寵貽。用資沖守。

恩州賜大遼皇太后賀正旦人使茶藥口宣

元厯開祥。寶鄰申好。駕輶車而將命。馳塞路以爲勞。適冒陸冬。宜推寵錫。

班荆館賜大遼皇帝賀正旦人使到闕酒果口宣

卿等遠飭車徒。初臨館舍。載歷凝嚴之候。靡勝行邁之勞。嘉果芳醪。聊申寵錫。

班荆館賜大遼兩番賀正旦人使生餼口宣

卿等並飭使華。載修鄰睦。念乘輅之何遠。適授館之云初。維餼及牽。具將蕃錫。

都亭驛賜大遼兩番賀正旦人使酒果口宣

卿等嗣將鄰好。舉穆賓儀。初違文石之班。將返輶車之駕。宜膺嘉惠。式展厚懷。

都亭驛賜大遼皇帝賀正旦人使銀鈔鑼等口宣

卿等夙致鄰歡。協修歲慕。遠涉塞途之勤。甫從賓館之寧。特舉賜常。以華使範。

都亭驛賜大遼皇帝賀正旦人使銀鈔鑼等口宣

鄰寶修歡。使華將命。載念遵途之勤。適應授館之榮。我有寵頒。惟其欽受。

賜大遼兩番賀正旦人使生餼口宣

卿等夙乘使傳。申致鄰函。甫寧館舍之居。爰舉餼牽之錫。卽宜欽受。庸副寵懷。

華陽集卷二十五

內制

皇伯祖承亮授檢校工部尚書榮國公威德軍節度使加食邑實封制

門下、蓋聞周興建土、遂應年歷之長、秦失罷侯、靡復藩維之援、此國家所以監用往制、封崇茂姻、以夾輔于王家、以懷柔于天下、肆膺皇緒、渙舉丕彝、皇伯祖具官某、躬著德之英、被忠訓之厚、曾無車服珍寶之玩、固有詩書道術之明、稽帝堯之仁、嚆先骨肉之愛、顧秦悼之後、不減祖宗之蕃、自居留務之榮、寢廣皇支之譽、按戊午之新澤、合南陽之近親、華鄂承跼、旌樂和于列邸、犬牙交壤、寄雄峻于師旄、旣衍爰田之封、又陪眞食之入、助建大統、圖瓘老成、於戲積厚者流長、雖本神明之祚、德隆者爵重、況如宗族之賢、均履多祥、勉欽渥命、

皇伯祖承亮授依前威德軍節度使改封秦國公制

門下、國家世承燕謀、天祚明德、乃眷祖宗之裔、未正封爵之科、豈朕所以上隆尊統之風、下形惇族之愛、肆攷厥典、載謀有司、其頒顯冊之書、以孚羣位之聽、皇伯祖具官某、廣陵之嗣、昭武之孫、系出帝者之本支、多閱天下之義理、安處樂善、匪車服能修其心、夙興奉朝、雖風雨不逾其節、故宗族仰其循則、神明相

之高年。屬崇建于近親。方按求于故壤。自隴而右。奄有土疆之長。如麟之詩。特旌信厚之履。以應古之遺法。以率民于至仁。於戲。廣同姓之封。大爲藩屏之固。觀盛德之世。永保子孫之休。益懋英猷。尙對嘉命。

皇伯宗樸授光祿大夫依前檢校尙書左僕射同中書門下平章事充彰德軍節度使加食邑功臣制

門下、郊廟、大事也。禮莫盛于躬行。天地一功也。義蓋尊于合祀。朕盡奉先之孝。嚴反始之文。既獲能饗之名。以要三神之顧。又膺無窮之祉。以浹四海之歡。矧我茂親。敢稽渙命。皇伯具官某。德莊而氣粹。性靖而量夷。系出帝者之本支。多閱天下之義理。慕二獻之學。自樂詩書之聞。聯三事之榮。靡矜富貴之守。屬至景之乘序。卽崇丘而告禋。精佩無譁。夙助齋居之恪。盥疊致潔。屢陪獻禮之升。維釐事之肅成。方勞恩之誕舉。雖無崇鼎分器之錫。亦有濮田多井之加。既益號于功臣。復進階于文散。以華邦族。以變民雍。於戲。聖人因親。必廣同宗之愛。賢者奉祭。宜蒙百順之休。其迪善猷。永有吉祿。

皇伯宗諤授光祿大夫檢校尙書左僕射同中書門下平章事號國公集慶軍節度使加食邑實封制

門下、朕纂臨丕基。欽篤前烈。蓋義尊乎祖。愛因隆于六親。治形于家。風遂行于四海。適緣曠澤。先暨皇支。皇伯具官某。器介而用通。體莊而資裕。多閱天下之誼。盡讀河間之書。攷潤邸之蕃。誰及宗英之望。追濮

園之舊實由子愛之深。比旌別于師壇。允夾隆于王室。慶屬皇圖之啟。惠加同姓之褒。其服大僚。以卽台路。曷以近藩之節。陪之多邑之封。雖本異恩。亦稽先矩。於戲。唐封近屬。悉留京師之居。漢寵諸王。少在公卿之列。維是高華之保。莫如法度之修。矧屬英懷。詎煩至戒。

皇伯宗諤落同中書門下平章事制

門下。朕紹休祖宗。崇建藩屏。所以合邦族之愛。厚人倫之風。雖于近親。若共維之一體。厥作棗德。亦難廢于大公。皇伯具官某。席慶皇支。參華天路。維安富貴之習。靡躬法度之修。乃外招事權。內轢宗黨。知省勞難分。而移文固析。知宮寺有禁。而遣吏輒通。致風憲之上言。加議論之並起。朕閱失戒。慎務全仁恩。其上丞相之章。仍領元戎之節。欲止不獲。誰咎之詒。於戲。臣無作福威以杜諸侯之漸。上不私賞罰以一萬民之歸。宜勉自思。庶復來譽。

皇伯允弼授依前北海郡王加食邑實封功臣制

門下。朕肅膺駿命。懋述先猷。思所以廣嚴父之慈。昭事神之道。而合宮寢制。太微寓饗。且皇祐之議。猶參百靈之從。故辛亥之獻。獨尊上帝之配。相我大事。時維茂親。休有寵章。格于公聽。皇伯具官某。性資英邁。檢履渟深。天發神明之裔。世資忠厚之德。每伏謁禁朝。還咏燕室。進退亦有常處。紛華而無流心。攷公子之詩。既協關雎之應。受王者之社。遂荒徐郊之封。先甲告禪。大宗董屬。鳴佩結玉。以深齋戒之思。重觴薦

席又陪陟降之恪。至精以來神聽。強立以饒禮成。詳稽陟典之常。表錫功號之美。胙之多邑。衍之眞賦。且明宗周異姓之後。兼懋帝堯九族之和。於戲。福祿之臨。有若岡陵之固。急難之儆。莫如兄弟之懷。茲庸展覲。其往迪訓。

皇伯允弼檢校司徒兼中書令改封東平郡王加食邑實封制

門下國家膺累聖之圖。啓中天之運。重惟菲德之嗣。惕若先猷之承。仁恩滲于萬方。親厚始于九族。有如伯父。實曰賢王。宜因涓日之嘉。誕布告庭之渙。皇伯具官某。氣和而履順。資正而行恭。源流發于天淵。本支茂于邦翰。推河間之學。務勤詩禮之聞。蹈宣父之言。思長富貴之守。服我文考。冠于內朝。以宣夾輔之勤。以董宗盟之事。師壇命節。旣專仗鉞之行。帝蹕陪輿。又寵冠蟬之飾。肆紹休于丕序。首旌德于茂親。進班右相之尊。視秩三卿之貴。尹虞郊之舊俗。裂汶土之奧封。益以爰田。衍之眞賦。褒隆邦錫。美協師謀。於戲。念祖宗之基。固起艱難之迹。維骨肉之分。敢忘敦睦之懷。勉迪順猷。永綏多福。

皇伯允弼授依前東平郡王加食邑實封制

門下朕乘初陽之序。建大祀之儀。親祓鬯主。始見清廟。夙駕齋輅。肇禋紫宮。有昊博臨。賜朕純嘏。于時日景溫霽。坤倪肅清。逮燭熙事之成。敢後茂親之獎。皇伯具官某。性蹈謙恭。體函忠醴。不擁皇支之祥。遠爲藩戚之表。董我宗正。爰繫敍族之賢。胙之東平。每符樂善之美。此先帝之加遇。而沖人之用欽。會華玉之

展祠被溫貂而在位。非神明接而福莫享。羌親賢隆而教彌尊。是用孚慶第勞。褒功錫號。疇其多邑。衍以眞租。萃爲寵章。以煥惠術。於戲。躬天地之報。旣膺靈顧之私。廣骨肉之恩。用篤人倫之愛。往綏吉祿。永懋休聲。

皇弟額授光祿大夫。依前檢校太尉同中書門下平章事。充武勝軍節度使。進封安樂郡王。加食邑實封制。

門下。朕躬大統之承。憲前王之度。並建宗子。庸廣骨肉之恩。作扞皇家。思長社稷之守。方曠恩之澤。物宜渙檢之宣。朝。皇弟具官某。體行端和。風神華秀。孝友自其天性。忠謹承于世資。早就學于奇觚。已析封于事字。念鵠原之愛。嘗見急難之情。嘉麟趾之風。居多信厚之履。屬肇親于庶政。且徧獎于近支。往踐鈞衡之崇。益疏茅社之貴。化由近始。愛莫爾隆。於戲。禮重周盟。以薛侯而爲後。義形漢約。非劉氏者不王。懋昭淑聲。永服徽命。

寶安公主進封舒國長公主制

門下。漢推女愛。皆主上公之隆。堯廣族恩。遂變黎民之睦。顧荷先謨之託。敢忘近屬之褒。適攬政機。誕頒廷渙。寶安公主。生知淑訓。日就芳儀。維越在于妙年。已積流于惠問。永念先帝。實深天性之情。載維沖人。尙輯國風之美。方鴻恩之冒物。因厚意以展親。雖無分玉之華。亦有加田之寵。錫之大國。蓋擬諸王之封。

益以長名。用尊同氣之屬。以孚至化。以應前彝。於戲。慰長信之慈。維孝愛所以型國。考大家之誠。維驕盈不可饑人。往承之休。益懋爾祉。

寶壽公主進封順國長公主制

門下。朕握元符。以建中天之統。合茂族。以厚萬國之風。矧惟同氣之親。鍾在先朝之愛。流徽載冊。揆吉敷朝。寶壽公主。儀度夙成。聰明日就。衍于皇裔。實爲邦媛之良。主以上公。蚤錫天孫之號。奄罹鉅痛。適履妙齡。追膝下之素遊。發禁中之永慕。顧膺聖歷。義篤人倫。思展愛于友懷。宜躋榮于邦數。胙封名壤。播德穠華。於戲。古有賢女之圖。旣飭以組紉之事。上承文母之訓。又勉以蘋藻之儀。爾祉是綏。厥休惟永。

順國長公主進封冀國大長公主制

門下。朕承帝祚之來。則知繼繼之所以重。經人道之始。則知親親之不敢遺。發大政于初朝。錄羣宗于舊牒。化行編宇。惠本皇闈。順國長公主。性嶷而色恭。德專而言靖。躬宵明之盛則。慕彤史之遺芳。蓋先朝同氣之親。有慈壽少女之愛。雖湯沐之賦。蚤視眞王之所封。而車服之榮。不以貴主而自侈。肆纂承之末類。懼尊遇之靡昭。重緣訪落之謀。誕錫鸞廷之冊。旣加之長號。又諡以大名。載疏連土之腴。式副諸姑之寵。於戲。王姬亞后。本召南之正風。帝女開田。用西京之故事。往膺嘉數。思廣徽音。

皇長女徐國公主進封陳國長公主制

門下、朕承天纂極、雖賴祖宗之休、經國範民、奚先族屬之愛、惟是頒常之始、矧予同氣之親、敷告治廷、嗣
頒顯冊、徐國公主、體專正懋、德懋柔明、蚤佩箴管之儀、知女工之無不至、時觀蒞醢之奠、知婦事之無不
虔、比從築餘之行、每念結褵之訓、應天飛于神運、孚邦號于渙風、載荒南國之腴、且擬沁園之盛、化維近
始、愛實中流、於戲、表鮑女之宗、嘉外事之所不及、抑館陶之子、戒內謁之不可與、勉迪前規、永綏令福、

皇長女封德寧公主制

門下、朕荷九旻之顧、奉四聖之圖、恭陟厥后之尊、大纂有邦之慶、蓋化行乎中者、治之本、恩發于近者、愛
之隆、既展睦于皇宗、矧鍾慈于天性、稽我成憲、豈云私親、皇長女、秉幽靖之儀、賦柔明之德、神祚衍于遐
派、天資茂于芳年、有勤澣服之工、嘗攬繪圖之戒、肆鴻休之不冒、宜徽稱之肅承、方主以同姓之賢、復視
以真王之秩、可欽非寵、可慎非猷、於戲、美王姬之華、昔起召南之詠、建帝女之號、近遵唐室之彝、勉流淑
聲、永保隆福、

皇長女德寧公主進封徐國公主制

門下、周美王姬之華、下正后之一等、漢推帝女之寵、主同姓之諸公、故至愛行而九族歡、內則正而四海
順、乃睦公宮之懿、適從世閱之逮、宜合丕彝、用孚羣聽、皇長女德寧公主、僊支襲慶、邦媛流徽、鍾天性之
深慈、躬女圖之茂矩、幼而勤組紃之習、亦旣飭婦事之修、長則有室家之歸、將以經人倫之始、維衿鞶之

有命維車馬之有行。卜仲冬之嘉辰。社大易之元吉。瓊華在著。已戒齊風之禍。粉水疏園。莫如徐國之樂。侈燕謀于皇裔。充美化于民間。顯錫徽章。大旌柔度。於戲。前攬唐家之制。鹽饋不可以闕供。近稽仁廟之樛。冠服仍從于少損。蓋肅雍者賢之檢。儉約者古之師。其體至懷。自膺長譽。

皇第二女封寶慶公主制

門下。仁篤于親。時則底風化之美。事師于古。衆不以名公爲私。適監近司之陳。且族皇女之號。靡顯予愛。用迪厥彝。皇第二女慶發溫潢。秀生紫掖。如素舒之秋耀。如穠李之春華。未舉公宮之儀。已昭賢女之範。將輔成于淑質。宜嘉錫于美名。加之以綸狄之衣。副之以辟邪之玉。雖曰命上公之主。不敢擬半楚之封。然而秩視眞王。禮參正后。茲爲人子者貴之盡。亦有天下者親之隆。匪颺大謨。曷穆羣聽。於戲。皇室多祉。嗣膺百世之昌。天孫下遊。更洽三宮之慰。勉躬柔度。進服殊休。

德妃沈氏進封貴妃制

門下。朕膺先聖之託。臨舊貫之居。重思宮籍之美。昔預宸帷之侍。孰旌爾止。已流彤管之芳。肆命于廷。載下紫芝之渙。恩繇近始。教式外孚。德妃沈氏。賦燕婉之儀。秉柔明之德。顧乃祖服。蚤登鼎鉉之榮。逮我眞朝。居懷掖廷之選。自參嬪側。實右王休。悵仙蹕之空遐。館離房而永慕。有圖書之誠。期專蹈于前規。無敢錫之私。曾略扞于內治。天與壽康之福。衆高賢惠之風。宜冠序于四星。益亞儀于中綢。茲爲異數。以獎夙

勤於戲化行周南。既厚人倫之本。祇事文考。猶傳皇訓之存。是則寵有以特隆。禮不可他擬。往膺徽冊。永荷嘉祥。

賢妃苗氏進封德妃制

門下。帝居六宮之制。率輔于三猷。天極四星之華。實裨于靈事。朕嗣膺邦統。思穆人倫。褒臨妃掖之英。化始宸闈之順。命龜薦日。班綽布朝。賢妃苗氏。性資惠明。儀度閒肅。居蹈箴圖之戒。動循珩珮之和。八月良家。早被後庭之選。平陽別館。爰開貴主之祥。而能進遠驕華。舉思謙畏。綸衣奉祀。上以贊于后勤。彤史流徽。下以儀于嬪則。庸責德言之茂。益隆位序之崇。名以副勞。議非常典。於戲。坐而論婦之禮。蓋視三公之尊。內有進賢之心。始安君子之佐。維正道然後式于外。顧私謁不可黷于中。往服訓辭。永綏寵命。

韓琦授依前同中書門下平章事進封儀國公加食邑實封制

門下。朕按奉高之儀。思承上帝之福。詠我將之什。知配文王之功。諏辰季秋之良。盡志孝饗之事。應一郊之定。卜躬三歲之宗。祈于時。陳物采于國中。接神明于堂上。璧玉溫潔。粢盛令芳。靈光燭于大庭。休氣蒙于重宇。疇相丕祀。於顯元臣。肆膺拜胙之釐。首布告庭之命。具官某。命世發德。佐王矢謀。財萬化于物宜。熙百工于帝載。已任沉機之斷。力陳遠馭之圖。若歲爲霖雨。可以濟天下之旱。如易占龜策。可以判天下之疑。責大而智愈深。事昭而精猶勉。乃先庚之詔。靡物備而不嚴。維自昔之文。或禮闕而不講。使朕得真。

六天之對。款七廟之靈。輯于昭曠之儀。顧匪烈文之輔。茲庸錫之名壤。建爾上公。寢廣奉田之腴。復敦眞食之賦。汝爲汝聽。汝勞汝嘉。於戲。在福不敢康。蓋天有難忱之命。于德而弗及。蓋民無常懷之心。雖朝廷之甚休。益君臣之相勅。宜興盛治。允答靈歆。

韓琦授門下侍郎兼兵部尙書依前同中書門下平章事進封衛國公加食邑實封制

門下王者。紹景炎之序。履皇極之尊。永維置器之艱。屬在佐王之略。瞻夫上宰。翼我先皇。適及委裘之辰。肆于奉瑁之始。定策宗社。貫心神明。逮躬丕務之咨。敢後元勳之獎。首膺邦渙。誕告朝倫。具官某。器博而適時。道閎而濟物。稟星辰之精粹。會日月之休明。歷宣外勞。更倚二柄。蹈夷險之一節。寄安危之大機。仰文考之知賢。絕時髦而登用。維召公之託。嘗聞顧命之言。維漢相之謀。終應大橫之兆。蓋懷先見者。識之遽決。至慮者。材之英。人扶不拔之基。神贊非常之輔。是用進文昌之卿序。正黃闥之台符。隆以封爵之文。益之戶田之數。以蕃爾寵。以懋爾庸。於戲。天視靡私。居飭有邦之畏。民心曷戴。一歸厥后之仁。念先猷之弗敢康。顧成業之不可恃。益經茂烈。永佐昌圖。

韓琦授依前同中書門下平章事進封魏國公加食邑實封功臣制

門下。朕考成命之頌。以報天地之仁。奏興安之歌。以詠祖考之德。維燎升而至精薦。維禋行而至孝通。顧國事之大不敢康。本神惠之至不敢愛。矧予秉德之輔。固有相祠之勞。宜蠲嘉辰。首告列位。具官某。篤亮

廉正靖莊簡夷辭氣涵和社稷之計已定誠明安達陰陽之變已調追言聖考之知肆及沖人之遺屬肇躬于元祀實總使于先期鍾石在庭而釋諸簋簠在席而嘉潔感靈觀之右答底熙典之備成上功太常既爲一代之寵析土全魏又繼前人之休廣爰田之載腴陪貢賦之載厚庸蕃爾數庸豐爾猷於戲上下合祛日格羣釐之貺左右同體盡圖有永之寧往服茂章聿綏純履

富弼授依前檢校太師同中書門下平章事鎮海軍節度使判河陽加食邑實封功臣制

門下入筦天樞以導萬微之命出藩王室以倡九牧之風維時左右之良固無內外之間宜頒渙命式告治庭具官某執心端夷涵德粹茂有幾聖之學窮天人精禪之原有經世之材洞國家表裏之體方先帝之在御擢乂于冢司肆沖人之守圖召謀于宥府百姓有衣食之遂四夷無兵革之虞迺去冬以來屬病在告雖懷憂國之慮每上退身之言眷舊德之弗忘終高情之靡已聽解神機之劇越升揆路之崇建海岱之高牙填河橋之巨屏加以爰田之戶衍以異食之封併舉徽章式優賢輔於戲進而合諸道得君子光亨之時退以遂其私保大雅明哲之福往綏沖履還翼丕成

富弼依前同中書門下平章事充武寧軍節度使判河南府兼西京留守司事仍賜功臣制

門下三台處中以裁萬物之化四嶽總外以牧黎民之蕃如山河之經九州如股肱之衛一體出處之際朕無間然具官某復貫有元蹈中弗勉學幾聖而獨至識造物之未形貴名起于三朝盛德儀于百辟曩

召從于列屏。俾進翊于冢司。爲日尙新。何恙靡已。未及經邦之務。遽陳避位之辭。詔雖屢而莫回。章甫卻而復至。朕憮然自念。嗟莫能勝。旣閱勞于政幾。其聽遂于私佚。建彼徐節。以殿東郊。守茲洛符。以保西宅。仍位鴻鈞之貴。尙優黃髮之行。於戲。不處成功。專老氏榮名之畏。其旋元吉。要義或履道之終。雖弗從于吾游。亦自保于爾福。

文彥博授樞密使改賜功臣制

門下、天極環樞。上通帝位之紀。神兵會府。內嚴師律之謀。朕方垂講。不平。進經常武。雖天下無事。思備禦之不敢忘。蓋王者有征。視安危之不敢忽。適登髦傑。資以輔予。具官某。器閎而深。材敏以濟。早賁賢人之業。實膺聖考之知。以忠孝之名。形國家之盛節。以文武之略。輯將相之大猷。肆纂命于皇圖。迺離憂于喪紀。迨終哀戚。甫見儀刑。屬疆事之方興。煩師施之載舉。折衝境外。方將出憺于王靈。收畫幄中。曷若坐圖于廟勝。宜掌機廷之務。賈符巖石之瞻。於戲。過餌北戎。未厭貪驕之志。再盟西夏。猶苞狂忽之圖。終佇奇勳。用恢遠馭。

文彥博授守司空依前樞密使加食邑實封制

門下、朕若稽先王。維御羣品。左謀金鉉之老。以經治于廟堂。右屬鴻樞之良。以定策于帷幄。厥有成績。可勿褒乎。具官某。風力肅明。器資恢傑。臨至劇有轉圜之易。定大謀如執玉之堅。逮事神文之朝。已緝熙于

鼎路。追言聖考之遇。又密勿于機廷。肆涼昧之不承。會精神于羣慮。雖兵民之異本。亦文武之交修。未隆贊冊之恩。曷懋圖庸之舉。其保宏父。允釐華陽。顧豈名分之私。終繫老成之助。於戲。有若閔天。尙迪文王之彝。罔俾阿衡。以專商家之美。往篤爾烈。永承予休。

文彥博授依前檢校太師同中書門下平章事潞國公行眞定尹充成德軍節度使加食邑實封制門下。禮舊德所以尊朝廷。重外寄所以穆風俗。迺眷上台之輔。有勩四國之宣。紀在太常。欲車服之稱。丕烈告于剛日。如風雷之鼓衆。聞舉合至公。敷爲茂命。具官某。言該而復貫。識至而與幾。端毅蹈于大方。忱恂懋于衆行。始究舒于賢蘊。亟感會于聖期。進聯禁路之華。登冠宰廷之務。代天之化。以遂萬物之宜。秉國之鈞。以正百工之度。中翼皇圖之懋。外藩王室之寧。樂于先身。安計道塗之勩。篤于信己。靡滿金石之堅。顧全魏之別都。領三關之要處。洪河襟帶于左。利兵鵲鶴其行。煩邊畫之是經。驚歲陰之屢易。茲用徙常山之帥節。委西宅之宮符。尹正二郊之民。眞陪多邑之賦。北堂是懋。應深孝養之榮。東閣雖開。猶抑士林之望。姑從素欲。并答成勩。於戲。寵祿以靡賢人。貴執隆于將相。忠義以礪天下。報莫極于君親。維抱閔材者志遠圖。躬大節者要終德。往綏邦倚。永對天休。

文彥博授依前檢校太師尙書左僕射同中書門下平章事成德軍節度使判太原府制門下。眷大河之東。領太原之道。西折畔羌之侮。左制強敵之衝。每析寄于閭符。必圖良于邦翰。適疇廊廟。

之舊。往殿股肱之區。命告剛辰。譽孚羣聽。具官某。氣嚴而中裕。道粹而外融。達古今治亂之原。洞文武弛張之略。自振藻于昌會。亟揚聲于邇塗。參凝九德之謀。進履大僚之服。居則幹天元。化靡萬類之弗熙。出則道國寬。條罔幽情之不達。兩踐中階之冠。比均留籥之司。勤勞邦事之圖。荏苒歲陰之隔。按常山而徙節。卽揆路以升聯。雖懷仄席之思。終賴撫邊之寄。矧叔虞之舊壤。有全晉之遺風。道俯松阡。應待齊施之駐。朝期竹馬。或先懸弩之驅。茲茂常恩。亦華素志。於戲。槐庭贊道。旣高儒者之榮。玉帳論兵。又極元戎之貴。惟忠盡可以圖永。非威惠不足服人。矧屬老成。詎煩深訓。

賈昌朝授依前右僕射檢校太師兼侍中充保平軍節度使許國公加食邑實封功臣制

門下。朕會三歲之虔。歷西安之吉。始歌德于清廟。遂報功于上穹。崇堂鄉明。美玉薦信。蓋悽愴怵惕之威。集則孝所以興。聰明齋肅之志形。迺福爲之降。肆嚴禋之就緒。瞻舊政之敏謀。誕賦神休。茂揚廷號。具官某。望嚴而氣裕。機遠而慮微。材兼文武之英。學洞天人之蹟。嵩高之詠。早凝生甫之祥。渭水之游。忽獲非熊之兆。乾端休靖。王度粹夷。告二府之元猷。宣四方之良績。如股肱之衛予體。有金石之載厥聲。且祀莫大于躬行。禮莫隆于崇配。邊符威重。雖不及奉璋之趨。祀物精華。時則有充庭之助。丕承上下之應。參澤中外之勤。號尤貴于褒功。邑益大而加食。載高斯閎。載渥斯章。於戲。尊親我臨。甫格馨香之治。藩嶽予屏。亟均湧涵之祥。益劭忠圖。永綏靈貺。

賈昌朝授依前檢校太師行尙書右僕射保平軍節度使判大名府兼北京留守司事加食邑實封制

門下、朕寵延哲艾、周緝化幾、蓋功盛者爵所加、任隆則報亦勉、適眷居留之重、載惟擇守之難、甫稽卜于衆謀、終圖庸于宿望、告于列位、協以剛辰、具官某、體貫文明、器函精粹、德符君子之守、學蹈聖人之歸、繇復旦之逢辰、卽近途而振業、露門勸講、經席尊于師臣、台府熙工、國事倚于元老、洊揚休于中外、均注意于安危、政穆民風、寢廣京師之福、心經邦論、幾虛朝夕之咨、惟北道之襟喉、主別都之筦籥、坐寄拊綏之策、舊維總制之雄、爰換節于奧封、復加田于眞賦、茲洽累數、以優邇僚、於戲、寵冠貂蟬、賜專鈇鉞、入則儀三事之序、出則倡九牧之風、爲一時之至榮、亦前代之罕遇、懋肩忠烈、往服王休、

賈昌朝授依前左僕射兼侍中鳳翔節度使進封魏國公加食邑實封制

門下、王者誕膺寶命、肇纘丕圖、協乾應于天飛、渙風孚于邦號、顧以涼菲、荷于燕詒、永惟訪落之勤、參倚守藩之輔、顯申茂冊、告錫明廷、具官某、時推傑才、早遇先帝、縉博極之學、以勸講于禁中、敷深厚之辭、以鼓動于天下、寢發舒于美業、旣踐服于邇臣、入持宰鈞、遂冠謀于巖廟、出秉師鉞、幾換節于齋壇、至于珥蟬冕之華、析麟符之寄、端朝亮采、則百僚以師、制閫靖兵、則四夷是鎮、屬紹休于鴻緒、益尊德于老成、是用陟天臺左相之班、進方社元侯之律、按圖胙國、衍食陪封、併舉恩徽、以優賢艾、於戲、周美申伯、繁文武

之兼資。漢賴絳侯。實安危之參寄。蓋履大任者有至責。建茂勳者有遠名。惟永令圖以膺蕃數。

賈昌朝授依前尚書左僕射充觀文殿大學士判尚書都省加食邑實封制

門下王者賦祿于朝。所以礪天下之進。君子避榮于位。所以梃天下之浮。眷惟碩輔之臣。適領近藩之寄。忽露言于累牘。願還節于上臺。雖欲不從。其情已至。具官某。體忠忱之度。蹈夷雅之方。被神契于先朝。豐元猷于二府。若舟楫之輔于濟。有旂常之載厥成。鄉更北道之符。爰錫西清之對。雖舊德之加遇。亦美謀之屢陳。且申伯言還。式是南邦之喜。而留侯多病。欲辭萬戶之歸。朕申言爵齒之尊。憫勞將相之事。況文昌主揆。素維師長之崇。祕殿敷經。更得老成之助。拓其奉邑。衍以眞封。庸遂便安之私。尚旌沖退之節。於戲。雖爾身在外。常多王室之思。俾爾壽而臧。終保公徒之盛。數于列位。時迺之休。

張昇依前同中書門下平章事充彰信軍節度使加食邑功臣制

門下。夫燎升于郊。而天地通。禋將于廟。而祖考格。朕迪先王之典。習三歲之祥。事于上下。罔弗欽。飭于內外。罔弗協。肆被羣釐之委。盍先同德之褒。具官某。躬端亮之風。濟耆明之識。外盡力以經四方之事。內盡忠以導萬世之謀。一節自夷。孤衷易老。屬肇祇于禋土。適退守于陪藩。載懷邦倚之良。實契天飛之爵。且師施之重。莫侍屬車之行。而方物之嘉。有虔齋幣之貢。願上儀之丕就。豈寡德之是能。迺告外廷。其位特進。益以褒功之號。衍以奉邑之封。稽于僉謀。渙若不命。於戲。報天之本。既蕃福祿之承。答臣之恭。又宏爵

賞之施。往隨靈顧。益修徽聲。

張昇依前檢校太尉同中書門下平章事充彰信軍節度使判許州加食邑實封功臣制

門下夫達進退之分。則臣節高。篤始終之恩。則君道大。粵予耆艾之德。久財幾密之司。寵至而色愈兢。年險而志彌劬。匪推殊獎。曷表羣倫。具官某。敦簡廉之風。賦莊厚之體。早升華于政路。遂長議于樞廷。從容樽俎之間。游收于奇策。密勿廟堂之上。預定于大謀。自先帝之升遐。方冲人之在疚。顧家多難。有若涉川之危。繫國大臣。遂成奠枕之泰。鄉屢櫻于疾苦。比願解于機煩。朕雖眷春秋之高。不忘忠誼之至。俞音未卜。素尚益堅。宜膺台鉞之榮。用寄藩符之秩。陪始荒之奉邑。衍新食之眞封。舉示褒章。式旌美績。於戲。安世且老。豈不有夙夜之勞。申伯于行。是亦爲文武之憲。載惟令聞。奚媿前修。

張昇授太子太師致仕加食邑實封制

門下負高行者。能厲世媿競之原。保成功者。爲識天盈虛之道。故仲尼因浮雲而抗志。老氏非拱璧之介心。終之氣擴而無不充。力止而靡所殆。有懷舊德之輔。允迪前人之休。具官某。躬賢知之資。履將相之任。收堂上之奇策。定禁中之大謀。鄉解樞機之煩。適從藩翰之佚。受遺之託。終貽萬世之安。告老之書。繼三朝之聽。朕篤終始之明分。睠春秋之素高。其拜東宮之師。以安近邑之第。雖送車之盛。不及祖于都門。而行馬之施。誰若榮于故里。於戲。閔勞官職。蓋旌夫行義之尊。思見老成。不愈于典型之益。往綏茂履。終

華陽集卷二十五

憲酒言。

